



大眾閱藏經典彙編 **CBETA2018** 版

佛 本 行 集 經
(六十卷：第 7 卷至第 12 卷)

隋天竺三藏闍那崛多譯

汇编说明

佛教经典分经律论三藏，佛陀一生言教就保存在经藏中，阅读佛经仿佛得见去会，亲聆圣音，是后人学习佛法最直接的途径，更是末法时代树立正知正见、防止误入相似佛法的最可靠的依止方法，自然功德无量。能遍阅佛经或三藏，把一代圣教尽数熏入八识田中，直至成佛永为道种，是古今众多佛弟子的毕生心愿和梦想。

本汇编是大众阅藏网汇编 **12** 辑之外的 **11** 部大经之一的《佛說長阿含經》。

本汇编采用台湾中华电子佛典协会（**CBETA**）**2018** 电子版《大正新修大藏经》（电子《大正藏》）第 **1** 册 **No.1** 後秦弘始年佛陀耶舍共竺佛念譯的《佛說長阿含經》（**22** 卷）为底本。本汇编只有一册。

CBETA 为中华电子佛典协会（Chinese Buddhist Electronic Text Association）的简称，成立于 1998 年，免费提供电子佛典数据库供各界作非营利性使用，其发布的电子佛典数据库可以在网络上下载。

大众阅藏网，是一群正信佛子为倡导大众阅藏而设立的公益性文化传播平台，祈愿在三宝的加持护念下，使读经阅藏能普及到广大信众中去。

宗旨：本佛宗经，闻思正见

理念：阅藏很重要，人人能做到，活动无中心，引导有僧宝。

目标：让阅藏流行起来！

大众阅藏经书汇编的第 1 辑免费申请，“大众阅藏” 邮箱：yuezang@vip.163.com。官网网址：<http://www.yuezang.org>；

大眾閱藏網

二〇一八年十一月

佛经安置须知

1. 经典应恭敬放在清净高处以及其他书籍的上面，不可随意扔放床上、座椅上等不净处。
2. 凡经书等法宝阅毕，可辗转流通，赠送其他道友，不可任意烧毁或丢弃。
3. 如手捧或装于口袋携带时，不得低于腰部，不可挟腋下。
4. 不得口吹经上灰尘，应以专用净布拭去。
5. 不可在经典所在的地方，有种种污秽行为。

读诵佛经须知

1. 经典乃三世诸佛之师，如来法身舍利，亦当作真佛看，不可作纸墨等看。礼诵持念，种种修持，皆当以诚敬为主。
2. 不可躺着看经书，以口水沾指翻经页，不可以污手触经。
3. 经书上不可涂写。不得一边散心杂话，一边看经书。
4. 中断不看时，应夹放纸条、书签做记号。不可折页、折角，或经书面朝下作“人”字形搁置。

保宁勇禅师示看经警策文

夫看经之法后学须知：当净三业。若三业无亏，则百福俱集。三业者，身、口、意业也。

（一）端身正坐，如对圣容，则身业净也。

（二）口无杂言，断诸嬉笑，则口业净也。

（三）意不散乱，屏息万缘，则意业净也。

内心既寂，外境俱捐。方契悟于真源，庶研穷于法理，可谓水澄珠莹，云散月明。义海涌于胸襟，智岳凝于耳目。辄莫容易，实非小缘。心法双忘，自他俱利。若能如是，真报佛恩。

起诵仪

请佛发愿

稽首禮諸佛 及法比丘僧 我今為自利 亦利諸有情
與諸善同修 正聞大藏經 傳承三聖學 令正法久住

南无本师释迦牟尼佛
南无本师释迦牟尼佛
南无本师释迦牟尼佛

香赞

(一遍)

炉香乍爇. 法界蒙薰. 诸佛海会悉遥闻.
随处结祥云. 诚意方殷. 诸佛现全身.

南无香云盖菩萨摩訶萨 (三称)

开经偈

(一遍)

无上甚深微妙法 百千万劫难遭遇
我今见闻得受持 愿解如来真实义
讽诵经时 当愿众生：
顺佛所说 总持不忘.

(注：此阅藏仪轨可以根据需要自行调整)

佛本行集经卷第七

隋天竺三藏阁那崛多译

俯降王宫品第五

尔时。护明菩萨冬分过已。至于最胜春初之时。一切树木诸花开敷。天气澄清。温凉调适。百草新出。滑泽和柔。滋茂光鲜。遍满于地。正取鬼宿星合之时。为彼诸天说于法要。悉令其心爱乐欢喜。踊跃充遍不能自胜。诫劝诸天使行此法。教令厌离一切有为生老病死。求无上法。

是时。护明菩萨大士观彼天众。如狮子王。欲下生时。其心安稳。不惊不怖。不畏不乱。复更重告诸天众言：汝等诸天一切当知。此我最后受后边身。

是时。菩萨正念一心。从兜率下。如余诸天舍天寿时。离五欲故。生大忧苦。忘失正念。菩萨下时则不如是。菩萨下时。具足一切不可思议希有之法。

护明菩萨从天下时。时彼诸天忆菩萨故。一时号哭：呜呼苦哉！呜呼苦哉！我等既失护明菩萨。我从今去。永更不复得闻正法。减损我等功德之利。生死根本今益增长。

时净居天告彼一切诸天众言：汝等今见护明菩萨欲下生时。莫生忧恼。何以故？彼下生时。必定当得成阿耨多罗三藐三菩提。成已。还来至此天宫。为汝说法。犹如往昔毗婆尸佛、尸弃如来、毗舍浮佛、迦罗迦孙驮佛、迦那迦牟尼佛、迦叶如来。彼等诸佛皆从此去。怜愍汝故。悉各还来到此天宫。为汝说法。摄受汝等。今此护明菩萨大士。还如是来摄化于汝。如前不异。

尔时。护明菩萨大士于夜下生。当欲降神入于摩耶夫人胎时。时彼摩耶当其夜白净饭王言：大王当知。我从今夜。欲受八禁清净斋戒。所谓不杀生、不偷盗、不淫泆、不妄语、不两舌、不恶口、不无义语。又愿不贪、不嗔恚、不愚痴、不生邪见。我当正见。诸如是等禁戒斋法。我当受持。我今系念。恒常勤行。于诸众生当起慈心。

时净饭王即报摩耶大夫人言：如夫人心。所爱乐者。随意而行。我今亦舍国王之位。随汝所行。而有偈说：

王见菩萨母 从座恭敬起

如母如姊妹 心不行欲想

时护明菩萨一心正念。从兜率下。托净饭王最大夫人摩耶右胁。安详而入。护明菩萨正念正知、从兜率下、入母胎时。是时天人、魔、梵、沙门、婆罗门等。一切世间光明普照。复世界外黑暗之处。日月如是有大势力、有大威神。如是幽隐光明不照。德不能及此菩萨光。悉能达照彼处。所有一切众生各相谓言：云何此间忽有众生？

是时此地六种震动。所谓东涌西没。西涌东没。南涌北没。北涌南没。边涌中没。中涌边没。如是乃至起觉吼等十八种相。悉皆普现。

次复有千须弥山王。皆悉震动。千尼民陀罗山王、千持威德山王、千佉罗伽陀山王、千毗那耶迦山王、千马头山王、千弥尼陀罗山王、千善见山王、千铁围山王、千大铁围山王。如是等山悉皆震动。并及一切诸余小山。涌没低昂。嵬嶷峨嵯。出大烟气。四千大海及余诸池。浩瀚湍涛。洪波沸涌。其四大河。恒河、辛头、斯多、博叉。及余诸水。皆悉逆流。一切丛林、一切树木、一切药草、一切时苗。皆悉肥浓。长养滋茂。其下乃至阿鼻泥犁苦恼众生。皆蒙快乐。

以是因缘。菩萨从于兜率初下放大光照、一切世间幽昏黑暗悉令明者。欲为后时成佛道已。以四真谛智慧光明。普照一切愚昧众生。作先瑞相。

菩萨初从兜率下时。大地六种十八相动。及诸山王出大烟气。四千大海涌沸涛波。是故如来为未来世诸恶众生。没在烦恼垢浊淤泥。佛成道已。欲拔出置于涅槃岸。

菩萨初从兜率下时。一切诸水皆悉逆流。是故如来为未来世诸恶众生、随顺没溺烦恼流者。佛成道已。说法度脱一切众生。令其返本逆生死流。

菩萨初从兜率下时。悉能增长一切树木、药草丛林。皆令肥腻滋茂之者。为未来世诸恶众生。未种善根令种善根。已种善根令得解脱。

菩萨初从兜率下时。乃至阿鼻地狱众生皆受快乐。佛成道已。令诸众生解脱苦恼。受于快乐。以是因缘。于先示现是等瑞相。

又复菩萨兜率下时。右胁入胎。自余众生从产门入。佛得成道。为诸众生说清净法。回邪入正。此是于先示现瑞相。

菩萨正念从兜率下。托净饭王第一大妃摩耶夫人右胁住已。是时大妃于睡眠中。梦见有一六牙白象。其头朱色。七肢拄地。以金装牙。乘空而下。入于右胁。夫人梦已。明旦即白净饭王言：大王当知。我于昨夜作如是梦。当入于我右胁之时。我受快乐。昔所未有。从今日后。我实不用世间快乐。此梦瑞相。谁占梦师能为我解。

时净饭王召一宫监内侍女人而告之言：汝速疾来。至外宣敕。语我国师大那摩子。令急追唤八婆罗门大占梦师。所谓祭德、鬼宿德、自在德、毗纽德、梵德等。并老迦叶三子速来。

时彼使人白于王言：如大王敕。不敢违逆。

是时使人奉大王命至宫门前。大声唱言：谁在门前。颇有入宫婆罗门不？

时彼门前。有一当值婆罗门子。姓婆陀氏。名罗耶那（此言屋室）。报于宫监内使人言：我在于此。

其使人言：大王有敕。遣唤八大诸婆罗门能占梦者。所谓祭德、迦叶子等。

其使传告。乃至国师大那摩子承彼屋室使人之言。即便召唤八大占梦婆罗门师。及大那摩国师之子。同入宫中。

时净饭王告诸占梦婆罗门等。作如是言：昨夜夫人有此异梦。是何瑞相。有何征感。

时彼占梦婆罗门等闻王语已。善知诸相。善占梦祥。即具咨白净饭王言：大王善听。所梦瑞相。我当具说。如我所见。往昔神仙诸天经书典籍所载。而说偈言：

若母人梦见	日天入右肋
彼母所生子	必作转轮王
若母人梦见	月天入右肋
彼母所生子	诸王中最胜
若母人梦见	白象入右肋
彼母所生子	三界无极尊
能利诸众生	怨亲悉平等
度脱千万众	于深烦恼海

尔时。占梦婆罗门师白大王言：夫人所梦。其相甚善。大王今者当自庆幸。夫人所产。必生圣子。彼于后时必成佛道。名闻远至。

时净饭王闻诸占梦婆罗门师说此颂已。心大欢喜。踊跃无量。不能自胜。

时王备办无量肴膳。百味饮食。啖款舐啖。诸饼果等。种种施設。彼婆罗门自恣而啖。饭食讫已。时净饭王复将无量钱财宝物。以用布施。

时净饭王闻此相师占观妃梦。云是祥瑞相之后。即于其国迦毗罗城四门之外。并衢道头、街巷阡陌有人行处。安大无遮义会之所。人来须者尽皆布施。须食与食。须饮与饮。须衣与衣。须香与香。须鬘与鬘。涂香末香。衣服床敷毡褥。房舍屋宅。牛羊象马。及车乘等。是人须者。皆悉与之。作如是等种种布施。悉为资益于菩萨故。设是供养。

尔时彼处有一仙人。名阿私陀。能立外道种种诸义。已舍五欲。有大威神。有大德力。具足五通。常能到于三十三天集会之所。自在能入。彼仙多住南天竺国遮槃低城聚落。名恒河怛。去彼不远有一丛林。名曰增长。是时仙人在彼林中修学仙道。摩伽陀国一切人民咸皆谓此阿私陀仙是阿罗汉。摩伽陀国一切人民贵敬彼仙。尊重承事。

时彼仙人有所知解。悉以教人。自知见已。教他令见。时彼聚落有一童子。名那罗陀。彼那罗陀年渐长大。至于八岁。其母将付阿私陀仙。令作弟子。时彼童子供养恭敬、尊重师事阿私陀仙。尽弟子礼。无暂休息。

时彼仙人在增长林。昼夜精进。摄心坐禅。及那罗陀童子一处。其那罗陀侍者童子在仙人后侍立。执拂驱逐蚊虻。

菩萨从于兜率陀天正念下至净饭王宫、夫人右胁入于胎时。放大光明。遍照人天一切世界。复此大地具足六种十八相动。时阿私陀见未曾有希奇之事。异种光明。复见此地六种震动。心大惊怖。毛孔悉竖。自心念言：今有何缘此大地动？有何果报？时彼仙人少时思惟。默然而住。正念正定。

思惟知己。心生欢喜。踊跃无量。不能自胜。作是唱言：希有大圣！不可思议！世间当出大富伽罗！

菩萨初从兜率下时。入母右肋受胎讫已。时有一天。名曰速往。至诸地狱。大声唱言：汝诸人辈！一切当知。菩萨今从兜率天下。入于母胎。是故汝等速发誓愿。愿生人间。地狱众生闻此语已。所有众生。往昔以来。曾种善根。复造杂业。以恶强故。堕于地狱。彼等各各面相睹见。厌离地狱。复得光明。身心安乐。复得闻于速往世间诸天之声。舍地狱身。即生人中。所有三千大千世界。诸众生等。往昔以来种善根者。皆来于此迦毗罗城。四面托生。

菩萨入于母胎讫已。时天帝释及四天王。提头赖吒及毗留勒叉、毗留博叉、毗沙门等各相谓言：仁者当知。菩萨已从兜率天下。入在母胎。我等今须拥护守视。莫令其余或人非人恼乱菩萨。或觅其便。今此菩萨。唯是极大威德诸天乃能守护。非是世间人所能守。此是菩萨未曾有法。如来有此四种护持。具足无缺。此是于先守护瑞相。

世有众生。入母胎时不能正念。或住母胎。亦复不能专心正念。或复生时亦不正念。或有众生。入母胎时能专正念。住于胎中亦能正念。出胎之时亦能正念。或有众生。入胎正念。住胎正念。出胎之时不能正念。菩萨入胎。心亦正念。住胎正念。出胎正念。此是菩萨未曾有法。如来得成于佛道已。说法教化。无忘无失。知于众生机根而说。此是往昔希有瑞相。

菩萨在于母胎之时。常住右肋。不曾移动。自余众生。以不定故。或至右肋。或至左肋。以是因缘。其母患痛。受无量苦。菩萨在胎。处于右肋。不转不动。起立坐卧。不损

母胎。此是菩萨未曾有法。如来得成于佛道已。行菩提法。悉得成就。此是往昔于先瑞相。

菩萨在胎。不惊不怖。得大无畏。恶物不染。所有不净。涕唾脓血、黄白痰癢。不能秽污。自余众生。在母胎时。种种不净。如琉璃宝。以天衣裹。置不净处。亦不染污。如是如是。菩萨在胎。一切不净不污不染。此是菩萨未曾有法。如来得成于佛道已。于一切法。不染不著。此是往昔于先瑞相。

菩萨在于母胎之时。其菩萨母受大快乐。身不疲乏。自余众生。在于母胎。或复九月。或复十月。母受负重。身体不安。菩萨在胎。母若行坐、若眠若起。皆得安乐。身不受苦。此是菩萨未曾有法。如来得成于佛道已。速得阿耨多罗三藐三菩提。证得诸通及一切智。此是往昔于先瑞相。

菩萨在胎。母受禁戒。心常奉持戒行而行。自余众生。在母胎时。母行杂行。菩萨在胎。母持禁戒。不行杂行。此是菩萨未曾有法。如来得成于佛道已。及声闻众。最胜持戒。于世间中出大名闻。沙门瞿昙持戒无比。持戒分胜。此是往昔于先瑞相。

菩萨在胎。其母不生欲染之想。不为欲火之所恼乱。时菩萨母恒行梵行。自余众生。入母胎时。不久其母。欲心炽盛。倍多于前。菩萨在胎。其菩萨母于自夫边。犹尚厌离。不行淫欲。何况余人。此是菩萨未曾有法。如来得成于佛道已。眼根善伏。善藏善护。善覆善熏。复能因此如上所知。为他说法。如是耳根、鼻根、舌根、身根、意根。乃至善熏。复能如是。令他断故。修习说法。此是往昔于先瑞相。

菩萨在胎。其菩萨母不贪异味。自余众生。在母胎时。其母贪嗜。不知厌足。菩萨在胎。其菩萨母。不患寒热及以

饥渴。不恼其身。此是菩萨未曾有法。如来得成于佛道已。知四种食。此是往昔于先瑞相。

菩萨在胎。其菩萨母志习庶几。乐喜行檀。自余众生。在母胎时。其母悭贪。不喜布施。吝惜财物。

菩萨在胎。其母意乐行于布施。心意开解。居自家内。此是菩萨未曾有法。如来得成于佛道已。说不悭法。此是往昔于先瑞相。

菩萨在胎。其菩萨母常行慈悲。能于一切诸众生边。但是有识有命之类。悉皆愍念。自余众生。在于母胎。其母不仁。威德少故。行诸不善。恶口骂詈。

菩萨在胎。其菩萨母恒于一切诸众生边。作大利益安乐之心。此是菩萨未曾有法。如来得成于佛道已。能于一切诸众生边。行平等心。此是往昔于先瑞相。

菩萨在胎。其菩萨母如前端正。种种相貌悉皆可喜。自余众生。在于母胎。其母损瘦。体不洪满。气力羸弱。倍于常人。

菩萨在胎。其母常生欢喜之心。戒行威德。身色最胜。最妙最尊。此是菩萨未曾有法。如来得成于佛道已。见身巍巍。不可瞻仰。体黄金色。众相庄严。此是往昔于先瑞相。

菩萨在胎。其母欲观于菩萨时。即见菩萨。在于胎中。身体洪满。诸根具足。譬如明镜鉴于面像。其母见已。欢喜踊跃。充遍于体。不能自胜。自余众生。在于母胎。被歌罗逻及阿浮陀之所覆蔽。而不能现。菩萨初入母胎之时。身体充满。五支五根。皆悉具足。此是菩萨未曾有法。

菩萨在胎。其菩萨母所见众生。若男若女。被鬼所持。若得见于菩萨母者。一切魍魎、一切鬼神。皆悉远离。还得本心。若体旧有诸余杂病。或痿黄病。或疯癲病。或痰癰病。

或等分病。或余诸病。所谓白癞、丁疮恶肿、疥瘙消瘦、痈疽癣痿、癭肿寒热。眼耳鼻舌、咽喉及头一切诸病所侵恼者。彼等众生来至摩耶大夫人边。其大夫人右手摩顶。摩其顶已。皆得安乐。诸病悉除。若有重病。不能来见摩耶夫人。摩耶夫人或取草叶。或取树叶。或取草茎。右手摩捋。送彼病人。其病人得此等诸物。或食或触。或置身上。即得断除一切诸病。便受安乐。身体轻便。

菩萨在胎。有如是等无量无边威神德力。未曾有法。

树下诞生品第六之一

尔时。菩萨圣母摩耶怀孕菩萨将满十月。垂欲生时。时彼摩耶大夫人父善觉长者。即遣使人诣迦毗罗净饭王所（摩诃僧祇师云。摩耶夫人父名善觉）。奏大王言：如我所知。我女摩耶、王大夫人。怀藏圣胎。威德既大。若彼产出。我女命短。不久必终。我意欲迎我女摩耶。还来我家。安止住于岚毗尼中。共相娱乐。尽父子情。唯愿大王莫生留难。乞垂哀遣。放来我家。于此生产。平安讫已。即奉送还。

时净饭王闻善觉使作是言已。即敕有司。其迦毗罗城及提婆陀诃两间之中。平治道路。除却一切荆棘沙砾。粪秽土堆。香汤洒地。持于种种杂妙花香。散于其地。又复光饰摩耶夫人。以诸种香、诸种花鬘、诸种璎珞庄严其身。备诸音声。作倡伎乐。持大王力、大王威风。从诸宫内一切嫔女。欲向其父善觉之家。于先遣使往彼报知。令来迎接。

是时。摩耶大夫人身安然端坐大白象上。时象背上。诸天化作微妙宝帐。摩耶夫人坐宝帐里。诣其父家。到于提婆陀诃城内。

是时。摩耶夫人初始欲向提婆陀诃城时。时净饭王办具一万大力香象。皆披金鞍。七宝校饰。庄严其身。并悉精丽。备拟以送摩耶夫人。

复有一万善好良马。皆紺青色。头黑如乌。皆悉披鬃。尾垂著地。真金鞅辔。鞍镫留羈。悉亦金饰。一切杂宝。庄严其身。

复有一万妙好宝车。并驾四马。其车周匝张悬幡盖。及众宝铃。铿锵相和。如是办具。皆随摩耶夫人之后。

复有二万劲勇力士。一人当千。威猛捷健。端正绝殊。能破强怨。身著铠甲。手执弓箭、刀杖斗轮及诸戟槊、种种战具。随夫人后。

复更别有一万宝车。十千妃嫔。皆坐其上。持诸璎珞种种衣服。庄严其身。左右围绕摩耶夫人。

时净饭王重更切敕宫监大臣。好加防卫。不听非司其余浪人逼近摩耶夫人之车及诸妃嫔。勿令杂合。唯遣童女牵车进奉。如是次第。摩耶夫人象乘处中。一万宝车。各各一妃。坐于其上。左右围绕。前后导从。摩耶夫人最为上首。其外复有一万香象、一万力士。皆服铠甲。随从夫人左右前后。卤簿而行。皆各坐于香象之上。又复一万步行力士。亦著铠甲。手执种种戟槊诸仗。翼卫夫人。如是庄严。

摩耶夫人诣向父所。无量象马皆悉嘶鸣。又有无量龙头大鼓。无量小鼓。种种乐器。出微妙音。无量庄严。无量威德。向于提婆陀诃之城。

时彼善觉大臣长者。共自眷属从城而出。逆前迎女摩耶夫人。又持无量庄严之具。引夫人前。是时善觉大臣有妻名岚毗尼。彼妇咨白夫善觉言：大圣释子！若当知时。诸释种

族各皆自有园果树林。遨游观瞻。至于其中。自相娱乐。我大圣子。今可造作清净园林。我等当共圣子娱乐。受于欢乐。

时善觉释摩耶大妃夫人之父。于迦毗罗及提婆陀诃两城之间。近自境内。为妇造作一大园林。以善觉妇名岚毗尼。为彼造立此园林故。以是因缘。即名之为岚毗尼园。彼园树木。蓊郁扶疏。世间无比。其中多有种种花树、种种果树以为庄严。复有种种渠流池沼。种种杂树无量无边。摩尼诸宝遍满园苑。

尔时。善觉释种大臣于彼春初二月八日鬼宿合时。共女摩耶相随。向彼岚毗尼园。欲往观看大吉祥地。到彼园已。摩耶夫人从宝车下。先以种种微妙璎珞庄严其身。复以种种杂好薰香。用以涂拭。众多嫔女、伎乐音声。前后围绕。安详徐步。处处观看。从于此林。复向彼树。如是次第。周匝而行。

然其园中。别有一树。名波罗叉。其树安住。上下正等。枝叶垂布。半绿半青。翠紫相晖。如孔雀项。又甚柔软如迦邻提衣。其花香妙。闻者欢喜。摩耶夫人安详渐次。至彼树下。

是时彼树以于菩萨威德力故。枝自然曲。柔软低垂。摩耶夫人即举右手。犹如空中出妙色虹。安详频申。执波罗叉垂曲树枝。仰观虚空。时菩萨母摩耶夫人立地、以手攀波罗叉树枝之时。时有二万诸天玉女。往诣摩耶大夫人所。周匝围绕。合十指掌。共白摩耶大夫人言：

夫人今生子	能断生死轮
上下天人师	决定无有二
彼是诸天胎	能拔众生苦
夫人莫辞倦	我等共扶持

尔时菩萨见于其母摩耶夫人。立地以手攀树枝时。在胎正念。从座而起。自余一切诸众生母。欲生子时。身体遍痛。以痛因缘。受大苦恼。数坐数起。不能自安。其菩萨母熙怡坦然。安静欢喜。身受大乐。

是时。摩耶立地以手执波罗叉树枝讫已。即生菩萨。此是菩萨希奇之事、未曾有法。如来得成于佛道已。无乏无疲。不劳不倦。能拔一切烦恼诸根。割断一切诸烦恼结。犹如截于多罗树头。毕竟不生。无相无形。无后生法。此是如来往先瑞相。

又复一切诸众生等。生苦逼故。在于胎内。处处移动。菩萨不然。从右胁入。还住右胁。在于胎内。不曾移动。及欲出时。从右胁生。不为众苦之所逼切。是故菩萨此事希奇。未曾有法。如来得成于佛道已。尽其后际修行梵行。永无有畏。常得快乐。无复诸苦。此是如来往先瑞相。

菩萨初从母胎右胁正念生时。放大光明。即时一切诸天及人、魔、梵、沙门、婆罗门等。一切世间悉皆遍照。乃至各各共相谓言：云何此处忽有众生？此是菩萨希奇之事、未曾有法。如来得成于佛道已。裂破无明黑暗之网。能出明净大智慧光。此是如来往先瑞相。

菩萨初从右胁出已。正心忆念。时菩萨母身体安常。不伤不损、无疮无痛。菩萨母身如本不异。菩萨生时。种种资益。以是因缘。母无患苦。身口及心。无有一恼。譬如有一大身众生。有大威德。有大气力。卧于地上。宛转自扑。其地不损、若减若破。如是菩萨在母右胁正念生时。其菩萨母。如是因缘。无疮无损。

是时彼处有一妇人。合掌咨白菩萨母言：大德夫人！生儿之时。身体得无痛苦以不？菩萨母言：以是大人威神力故。

令我身体不觉痛痒。我今身体无缺无减。以是因缘。此是菩萨希奇之事、未曾有法。如来得成于佛道已。行于梵行。不缺不减。具足不少。此是如来往先瑞相。

菩萨初从母胎出时。无苦无恼。安详而起。一切诸秽。不能污染。或屎或尿。黄白痰瘕。或脓或血。皆不秽著。自余众生。出母胎时。诸恶杂秽。菩萨不尔。不同于彼诸众生类。一切诸秽皆不染著。正心正念。安详而起。从胎出生。譬如如意琉璃之宝。用于迦尸迦衣裹时。各不相染。如是如是。菩萨在于母胎之时。一心正念。安详而起。清淨出生。无一切秽。乃至脓血、屎尿臭处。不秽不染。此是菩萨希奇之事、未曾有法。如来得成于佛道已。在于世间、住于世间。世所有法、世间秽浊。不污不染。此是如来往先瑞相。

菩萨初从母胎出时。时天帝释将天细妙憍尸迦衣。裹于自手。于先承接。擎菩萨身。此是菩萨希奇之事、未曾有法。如来得成于佛道已。创为娑婆世界之主、大梵天王。于先劝请如来说法。此是如来往先瑞相。

菩萨初从右胁生时。四大天王抱持菩萨。将向母前示其母言：世大夫人！今可欢喜。夫人生子。既得人身。诸天犹尚欢喜赞叹。况复于人。是故菩萨希奇之事、未曾有法。如来得成于佛道已。无量众多一切比丘及比丘尼。诸优婆塞及优婆夷。皆向如来听受于法。依如来教不违不背。此是如来往先瑞相。

菩萨生已。立在于地、仰观于母右胁之时。口作是言：我此身形。从今日后。不复更受。于母胁中。不入胎卧。此是于我最末后身。我当作佛。此是菩萨希奇之事、未曾有法。如来得成于佛道已。口作是言：我今生分。一切已尽。梵行已立。所作已办。不受后有。此是如来往先瑞相。

佛本行集经卷第八

隋天竺三藏闍那崛多译

树下诞生品第六之二

菩萨生已。无人扶持。即行四方。面各七步。步步举足。出大莲花。行七步已。观视四方。目未曾瞬。口自出言。先观东方。不如彼小婴孩之言。依自句偈。正语正言：世间之中。我为最胜。我从今日。生分已尽。此是菩萨希奇之事、未曾有法。余方悉然。初生之时。无人扶持。于四方面各行七步。如来得成于佛道已。得七助道菩提法分。此是如来往先瑞相。

菩萨生已。观视四方。如来得成于佛道已。具足而得四无畏法。此是如来往先瑞相。

菩萨生已。口自唱言：我于世间最为殊胜。如来得成于佛道已。一切世间诸天及人。悉皆尊重、恭敬承事。此是如来往先瑞相。

菩萨生已。口自唱言：我断生死。是最后边。如来得成于佛道已。一如语行。此是如来往先瑞相。

菩萨生已。诸眷属等求觅于水。东西南北皆悉驰走。终不能得。即于彼园菩萨母前。忽然自涌出二池水。一冷一暖。菩萨母取此二池水随意而用。又虚空中二水注下。一冷一暖。取此水洗浴菩萨身。此是菩萨希奇之事、未曾有法。如来得成于佛道已。得奢摩他、毗婆舍那。远离欲事。不假劳苦求其资财。一切自然。此是如来往先瑞相。

菩萨初生。时诸天等持于金床。与菩萨坐。坐已。菩萨
澡浴其身。虽是人身。诸天扶持。此是菩萨希奇之事、未曾
有法。如来得成于佛道已。得彼四种莲花之座、扶持如来。
此是如来往先瑞相。

菩萨初生。放大光明。障蔽一切所有光明。此是菩萨希
奇之事、未曾有法。如来得成于佛道已。无有一人能如法论
胜如来者。此是如来往先瑞相。

菩萨初生。身放光明。障蔽日光犹如昼星。此是菩萨希
奇之事、未曾有法。如来得成于佛道已。于诸声闻弟子众边。
自在获得最上供养、最上名闻。此是如来往先瑞相。

菩萨初生。一切树木、一切药草。随时开敷。此是菩萨
希奇之事、未曾有法。如来得成于佛道已。有诸众生。未得
信解。即得信解。已信解者。复得增长。此是如来往先瑞相。

菩萨初生。上界诸天持其白伞。真金为柄。大如车轮。
此是菩萨希奇之事、未曾有法。如来得成于佛道已。以不嗔
故而得解脱。离欲饶益。不劳勤苦而获资财。此是如来往先
瑞相。

菩萨初生。上虚空中一切诸天。各持白拂。悉用众宝以
为其柄。拂菩萨上。

菩萨初生。虚空清静。无有烟云。无有尘雾。但闻雷声。

菩萨初生。于上空中。无诸云雾。有微细雨。清静香水。
具八功德。令诸众生皆受快乐。

菩萨初生。四方空中起微妙风。清凉无恼。一切八方。
清静光泽。无有烟云、尘埃翳障。

菩萨初生。于上空中。无有人作。自然而出妙梵音声。

菩萨初生。于上空中。自出种种诸天音乐。种种歌声。
雨种种花、种种诸香。日光虽曝。不能令萎。此是菩萨希奇

之事、未曾有法。如来得成于佛道已。为诸世间。以诸智慧。现大神变。清净诸通。世间无比。如来为首。此是如来往先瑞相。

菩萨初生。于上虚空一切诸天。各持无量优钵罗花、钵头摩花、拘勿头花、分陀利花。诸如是等种种杂花。复持杂种微妙诸香。复持种种众宝花鬘。散菩萨上。散已更散。如是相续。

菩萨初生时。有五百诸天玉女。持诸天花所薰之油。诣向菩萨母前而立。安慰问讯。发如是言：善生菩萨！无疲倦耶！

菩萨初生时。有五百诸天玉女。持天涂香。诣向菩萨母前而立。安慰问讯。作如是言：善生菩萨！无疲倦耶！

菩萨初生时。有五百诸天玉女。持天种种宝微妙衣。诣向菩萨母前而立。安慰问讯。作如是言：善生菩萨！无疲倦耶！

菩萨初生时。有五百诸天玉女。持天种种杂宝璎珞。诣向菩萨母前而立。安慰问讯。作如是言：善生菩萨！无疲倦耶！

菩萨初生时。有五百诸天玉女。持天种种微妙音声。诣向菩萨母前而立。安慰问讯。作如是言：善生菩萨！无疲倦耶！

菩萨初生时。此大地具十八相。六种震动。一切众生皆受快乐。当于彼时。无一众生而生欲心。无复嗔恚及以愚痴。无慢无怖。无一众生造恶业者。一切病者皆悉得愈。饥者得食。渴者得饮。皆令饱满。无所乏少。昏醉众生皆得醒寤。狂者得正。盲者得视。聋者得闻。不完具者皆得具足。贫者得财。牢狱系闭皆得解脱。地狱众生皆得休息。畜生众生除

诸恐怖。饿鬼众生皆得充足。菩萨初从右胁生时。有如是等无量无边希奇之事、未曾有法。

从园还城品第七之一

尔时。有一大臣国师。姓婆私吒。名摩诃那摩。共诸国师婆罗门等。俱共往诣岚毗尼园。至彼园已。在门外立。

时婆私吒语诸国师婆罗门言：汝观于此大地。何故如是震动。譬如乘船在于水上。日月覆蔽。失本光仪。状如昼星。才有形影。一切树木。随时开敷。于上空中。清静皎洁。无诸云翳。但闻雷声。又虚空中。澄静朗耀。而有殊妙微细香雨。功德具足。自然而含八种之味。又从八方。起微妙风。其风清凉。冷暖调适。一切诸方悉皆清静。无有烟云、尘雾、翳黹。又虚空中。无有人唱。自然而闻深梵之声。复虚空中。闻于种种诸天音乐。复闻天歌、天赞天咏。雨天香花。日光虽曝。不能令萎。

时一国师报彼大臣婆私吒言：此事虽然。不足为怪。何以故？地性如是。有何不祥？

又一人言：今此大地六种震动。虚空敞晃。隐蔽日光。犹如从来昼看星宿。复雨天花。众光虽照。不能令异。甚为希奇。

其婆私吒共彼国师议是事时。时彼园中有一女人。从岚毗尼疾走而出。来到门外。时彼女人至门外已。见婆私吒及以国师。欢喜踊跃。不能自胜。语婆私吒及国师言：诸释种子！汝可速往至大王所。

是时。大臣及国师等见彼女人作如是言。兼复欢喜。不能自胜。问彼女言：汝令我等至大王所。当何闻彻。为奏欢喜疑怪、恐怖不祥事乎？

彼女报言：汝释种子！我今白汝一大庆幸欢喜之事。

其摩诃那及国师等问彼女言：有何喜庆？

彼女答言：国大夫人产一童子。端正可爱。世间少双。然此童子。直是真天。所以处处散于天花。放天光明。

时大臣等闻是语已。心大欢喜。踊跃充遍。不能自胜。

是时。大臣即解众宝妙好璎珞。赐彼女人。为闻如是欢喜事故。解赐已后。更复思惟：今此女人是王宫内时幸之人。王见是女。极大爱敬。我今解身璎珞赐与。后脱为患。即还收取。取已。转持施彼国师。舍已咒愿。作如是言：今以璎珞施于国师。所有功德。回施彼女。以何因缘？闻喜事故。

时彼大臣摩诃那摩语于国师婆罗门言：大婆罗门！汝今可还向大王所。奏是喜事。

时大摩那发遣于彼婆罗门已。更复重问彼女人言：汝先语我国大夫人产童子者。是天似天。放天光明。汝复更见有何异相？

时彼女人答大臣言：唯愿善听。彼童子者。相貌过人。有大威德。致令摩耶国大夫人立地之时。童子自然从右胁出。国大夫人胸胁腰身不破不缺。童子生时。一切诸天从于虚空。持好细妙迦尸迦衣。周匝遍裹于童子身。持向母前。作如是语。国大夫人。当自庆幸。倍生欢喜。何以故？今大夫人产育圣子。

当是童子初欲出时。仰观母胁。而说是言：我从今日。不复更受母人之胎。此即是我最后边身。从是以去。我当作佛。即立于地。无人扶持。即行七步。足所履处皆生莲花。一切四方。正眼观视。目不暂瞬。不惊不怖。正立东面。言辞辩净。字句圆满。非如孩童。而说是言：于诸世间。我为最胜。我当济拔一切生死烦恼根本。

童子在彼所立地处。以是童子身清净故。从虚空中。二水注下。一暖一冷。复持金床。令童子坐。澡浴其身。童子生已。身放光明。障蔽日月。上界诸天。持其白盖。真金为柄。大如车轮。住虚空中。又有诸天。手持白拂。众宝为柄。摇童子上。又虚空中。一切音乐。不鼓自鸣。复闻无量无边微妙歌咏之声。又雨香花。处处遍满。日光虽照。鲜洁如常。不能令异。

尔时。大臣摩诃那摩闻此语已。即自思惟：希有希有！于此恶时。而感大士出兴于世。我今应当自往净饭大王之所。奏闻如是希有之事。

时彼大臣取善调马。行疾如风。驾馭宝车。从岚毗尼园门外发。径至于彼迦毗罗城。未见于王。在先挝打欢喜之鼓。尽其身力而扣击之。

时净饭王坐宝殿上。辅相弼谐。治理国政。群臣卿士。百辟官僚。或后或前。左右围绕。皆悉闻彼欢喜鼓声。

时王惊问诸群臣言：卿诸臣等！是谁忽然敢能击我甘蔗种门欢喜之鼓。尽其力打。出是大声？

时守门臣前白王言：大王当知。王之大臣婆私吒姓摩诃那摩。驾四马车。迅疾如风。从岚毗尼园门外来。忽跳下车。尽其身力。即击大王欢喜之鼓。更无言语。直云我今欲见大王。

时净饭王语诸臣言：有何喜事？宜速唤彼婆私吒姓释种大臣摩诃那摩来。急到我前。

臣奉王敕。白言：大王！谨依教命。星速往唤彼释大臣摩诃那摩。勒令急疾到于王所。

时摩诃那摩闻王敕已。即至王前。高声唱言：愿王常胜！愿王常尊！今奉此言。增益身力。

时净饭王闻此语已。告大那摩释种大臣。作如是言：汝释大臣！何故匆遽速疾而来、尽于身力打欢喜鼓？

时彼大臣摩诃那摩即报王言：彼天臂城岚毗尼园。大王夫人中游戏。于彼树下生一童子。身黄金色。其状似天。乃至端正。放天光明。

时净饭王复更重问：审实相好！其事云何？

时彼大臣复报王言：夫人立地。乃至右胁。不裂不坏。童子生已。自立于地。诸天各持迦尸迦衣遍裹其身。仰观母胁。口如是言：我当作佛。拔断生死苦恼根本。澡洗放光。障蔽日月。树木药草。依时开花。虚空诸天。持白盖拂摇童子上。虚空雷声。微细天雨。凉风四来。不见其形。梵响乐音。不鼓自鸣。花照不萎。如上所说。一一次第。具咨白王。大王当知。我见是等希有之事。是故我今以欢喜缘。击欢喜鼓。敢遍告知。

时彼大臣复持诸天供养余花。敬奉大王。如是备说。

时净饭王闻是语已。告大臣言：汝既持是欢喜之事白我令知。如汝深心。欲求何愿。我当尽与。随意不违。

其婆私吒大臣答言：臣蒙王恩。无所乏少。

时净饭王复告大臣：法当乞愿。必当相与。

大臣复更重白王言：愿王欢喜。臣蒙王恩。无所乏少。

时净饭王复告大臣：汝今不应违于王敕。要须乞愿。我当与汝。

时婆私吒大臣白言：大王若当必定欢喜乞臣愿者。唯愿大王听臣奉事太子左右。随时给侍。所以者何？此之童子。今既生已。必定还续甘蔗日种。转轮圣王苗裔不绝。

时净饭王报大臣言：善知时者。随意所乐！

时净饭王告诸臣言：汝等大臣！应当如彼婆私吒臣之所典掌。国法吉祥。次第具录。勿令缺减。

时净饭王告大那摩释大臣言：大臣汝来！我国既生如是太子。今当为是胜上太子作于生法。

时净饭王大威德力。以王威神。诸臣百官左右围绕。犹如半月左右侍立。及摩诃那摩诸大臣等。发向于彼岚毗尼园。欲迎菩萨。至其中路。时净饭王告摩诃那摩及大臣言：汝等大臣！我闻生子。复见如是希有之事、未曾有法。岂不欢喜。覆自忧愁。

摩诃那摩大臣复言：大王！要当欢喜自庆。不须怀愁。何以故？天人所生。有如是法。不可思议大希有事。大王可不闻往昔。有一婆罗门。名多虱吒迦花生。彼生已后。不从人学。自然能解四种毗陀。

又复大王可不闻于往昔。有一顶生之王。从父顶生。生已。还如孩童一种。渐渐长大。王四天下。

又复大王可不闻于往昔。有一王名毗迦。从父掌生。非母腹出。

又复大王可不闻于往昔。有一王名留婆。从父髀生。

又复大王可不闻于往昔。有王名迦鞞婆。从父臂生。

又复大王可不闻于大王先祖。从昔以来名甘蔗王。从甘蔗生。是等诸王。虽生人间。不可思议。

时净饭王复更语于摩诃那摩释大臣言：汝大那摩！彼等诸王皆是大明。有大威德。此不方彼。

摩诃那摩以欢喜心复白王言：大王当知。此太子者。必定胜彼一切诸王。

净饭王言：有何胜相？

摩诃那摩大臣答言：彼等辈生。此太子生。臣比较量。知相大胜。

王复语言：汝勿戏调。所以者何？凡人父者。可不欲子最胜于他。或多见闻。或广知解。或善修行。或备礼仪。或明治道。或勤精进。有如是者。心则欢喜。

时净饭王说是语已。渐渐至彼岚毗尼园。至彼园已。在大门外。即遣使人白夫人言：夫人福德。善生圣种。夫人宜于太子生处。作吉祥事。敷设庄严。速令讫了。吾欲面亲观视太子。是子在胎。吾虽睹见于先种种希奇瑞相、未曾有法。但我今心爱念子故。自欲往看。

是时。摩耶国大夫人于童子备办种种世所应为吉庆之礼。皆悉讫了。即遣使人。奉报王言：大王知时。应入是园。

时有女人见净饭王已入园内。抱持菩萨。将诣王所。作如是言：童子今可敬礼父王。

王言：不然。先遣礼我师婆罗门。然后见我。

是时女人抱持菩萨。先将往诣婆罗门所。

是时国师婆罗门等见菩萨已。白净饭王。因咒愿言：唯愿大王常尊常胜。如见子胜。愿王释种。芽叶常兴。大王此子。必当得作转轮圣王。

时净饭王复问国师婆罗门言：所以知然？

是时国师复白王言：如我所见毗陀罗论所说诸相。合此子法。是事真实。

时净饭王复问国师婆罗门言：若如是者。我之释氏转轮圣王、甘蔗之种必当增长。何以故？今世诸王。于其福德、苦行精勤。皆悉缺减。若今生是童子有于此等福力。如昔劫初诸王福德。大力勇健、相具足者。是则我家必当兴盛。还如劫初诸转轮王。

时菩萨母摩耶夫人见净饭王并及国师婆罗门等。面色熙怡。即便咨白净饭王言：大王！示我转轮圣王相貌云何？善哉！为我略说其要。令我心喜。

时净饭王问于国师婆罗门言：仁者大师！愿为解释转轮圣王形状相貌。

时彼国师及婆罗门报净饭王及夫人言：唯愿大王谛听我说。我从先圣诸论相传。说转轮王所有自在功德悉具。若转轮王治化人民。彼转轮王必能飞腾虚空。而行住于地上。若时亢旱。随念即雨。若王界内。有于嗔恚诸恶众生。更迭相嫌。心怀恨者。以转轮王威德力故。国内众生各各欢喜。转轮圣王七宝具足。所谓金轮、神珠、象、马、玉女、主藏、典兵臣等。是名七宝。转轮圣王寿命长远。终无横死。少病少恼。身体端严。世间无比。于其境内。一切人民爱敬是王。犹如一子。转轮圣王爱护人民。过于赤子。

时净饭王复白国师婆罗门言：大婆罗门！如仁所说。夫为转轮圣王之者。皆有是事。然非我耶！

时菩萨母摩耶夫人复更重白净饭王言：大王！是事未足为怪。所以者何？此童子者。今日生于甘蔗种姓刹利家故。

时净饭王复作是言：希有之事。转轮圣王生于人间。但彼转轮圣王威德。如是大受果报胜业。我心生怪。往昔一切转轮圣王。无有如是诸奇特相。所谓甘蔗日种生王、尼拘罗王、憍拘罗王、瞿瞿罗王。或复我父狮子颊王及以我身。无有如是奇特之相。其事云何？复有何因？

是时。国师及婆罗门复更咨白净饭王言：大王当知。有前有后。未足为怪。大王可不闻于往昔有一国王。名耶耶坻。一切功德悉皆具足。父名婆流。其有一子。名为不流。不流有子。名屯头摩啰。屯头摩啰有子。名迦叉福。迦叉福有子。

名阿嚧祇不。阿嚧祇不有子。名曼帝隶耶尼。曼帝隶耶尼有子。名因罗婆毗罗。因罗婆毗罗有子。名头疏般那。如是等王具大威德。然不得作转轮圣王。彼等最后头疏般那。生于一子。名婆罗陀。其婆罗陀方始得作转轮圣王。往昔劫初有刹利种。名摩诃三摩多。从天而下。然不得作转轮圣王。其后次第辗转相承。到于顶生转轮圣王。王领乃至三十三天。祖父子孙苗裔继续。犹自退减。不得作于转轮圣王。

时净饭王复作是言：大婆罗门！此言为善。何以故？我亦欲得我子如此。亦愿我子如汝彼言。

时净饭王自心思惟：我今若将童子入城。作何辇舆？

时净饭王生是心已。是时工巧毗首羯磨。即时化作七宝辇舆。自然而成。不由人作。端严微妙。殊特少双。

时净饭王即出严敕。勒令修理迦毗罗城。洒扫耘除一切荆棘、沙砾礞石、粪秽土堆、恶露不馨。悉令净洁。其迦毗罗种种庄严。犹乾闥城。一种无异。其城所有种种杂戏。一切乐人。能歌能舞。巧为幻化。或有弄珠。或能出水。或庄严身以为妇女。如是种种变化所能。彼等一切皆悉云集。时彼大众。或有踊身掷在虚空。或复腾铃。或复打鼓。或著屣履。或缘竿头。或复倒行。首下足上。或复反掷。犹如旋轮。或悬虚空。上绳而走。或复盘槊。或复跳刀。诸如是等无量无边。种种戏笑。种种示现。或有扬声。大叫大唤。或复吹指。或弄衣裳。

尔时。护世四大天王各变其身作婆罗门。悉并幼年。端正可喜。头为螺髻。躬担菩萨宝舆而行。

是时。释天亦隐本形。化作童年婆罗门子。端正如前。头旋螺髻。身著黄衣。用其左手执金澡瓶。复以右手擎持宝

杖。在菩萨前。断于人行。口发是言：卿诸人辈宜各避道。
最胜众生今欲入城（上来四句。梵本再称。以明心重）。

尔时。色界大梵天王述往昔偈赞菩萨言：

天上天下无如佛 十方世界亦复然

世间所有我尽观 一切更无如佛者

尔时。菩萨从天臂城岚毗尼园初欲入于迦毗罗时。一切
诸天洒扫道路。复有五千诸天玉女。各各手内执一金瓶。盛
满香水。以用洒地。在菩萨前。次第而行。

复有五百诸天玉女。各持诸天微妙扫帚。在菩萨前。扫
地而行。

复有五百诸天玉女。各持诸天杂宝香炉。焚烧种种微妙
之香。在菩萨前。供养菩萨。引道而行。

复有五百诸天玉女。持金宝瓶。盛满妙香。在菩萨前。
引道而行。

复有五百诸天玉女。各各执持天妙多罗树叶之扇。在菩
萨前。引道而行。

复有五百诸天玉女。各各执持孔雀王尾。用以为拂。在
菩萨前。引道而行。

复有五百诸天玉女。各各执持多罗树叶所作荃提。在菩
萨前。引道而行。

复有五百诸天玉女。各各手执诸天胡床。在菩萨前。引
道而行。

复有五千诸余天女。各执金铃。时时摇动。扬声大唱吉
祥之音。在菩萨前。引道而行。

复有二万五千香象。悉金鞦辘。金为鞍鞞。皆被金甲。
一切校饰。悉是纯金。其庄具上。复笼金网。在菩萨后。次
第而行。

复有宝马。其数二万。悉皆青色。头黑如乌。鬃披垂地。一切鞦轡、鞍鞢镫具。纯金庄严。天金罗网以覆其上。随菩萨后。次第而行。

复有二万众宝妙车。驾以驷马。幡盖庄严。天金罗网以覆其上。在菩萨后。次第而行。

复有四万步兵壮士。皆悉勇健。各敌于千并好丈夫。有大筋力。能破怨隙。身被甲铠。手执弓刀。或把铁轮。或持戟槊。如是次第。在菩萨后。翊从而行。

复有无量无边色界最大威德诸天众等。在于菩萨右厢而行。

复有无量无边欲界最大威德诸天众等。在于菩萨左厢而行。

复有无量无边龙王、夜叉、乾闥婆、阿修罗、迦楼罗、紧那罗、摩睺罗伽、鳩槃荼、罗刹、毗舍遮等。出现半身。各各执持众杂妙花。满虚空中。随菩萨行。

复有无量、无数无边、亿百千万诸天神王。欢喜踊跃。皆悉遍满。不能自胜。扬声叫唤。或复吹指。或舞或歌。发殊异音。或弄衣裳。或弄手足。作诸戏乐。或持种种末香涂香、花鬘璎珞、曼陀罗等种种诸花。各自手擎。在菩萨上。于虚空中。行散菩萨。散已。复散一切诸天。以是菩萨威德力故。不闻人气。一切诸人。虽睹天色。亦不惊嗟。复不放逸。

尔时。一切释种眷属将四种兵。车兵马兵、象兵步兵。围绕菩萨。或前或后。或左或右。从菩萨行。充塞遍满迦毗罗城。其净饭王持大王力。大王威德。击无量鼓。大鼓小鼓。复吹无量无边螺贝。诸如是等无量无边。种种异类杂妙音声。娱乐菩萨。导引将入迦毗罗城。

时迦毗罗去城不远。有一天祠。神名增长。彼神舍边。常有无量诸释种族童男童女跪拜乞愿。恒得称心。时净饭王将菩萨还。至彼天舍。告诸臣言：今我童子。可令礼拜是大天神。

尔时。乳母抱持菩萨诣彼天祠。时更别有一女天神。名曰无畏。彼女天像。从其自堂下迎菩萨。合掌恭敬。头面顶礼于菩萨足。语乳母言：是胜众生。莫生侵毁（此上两句梵本重称）。不应令彼跪拜于我。我应礼彼。何以故？彼所礼者。能令于人头破七分。

佛本行集经卷第八

佛本行集经卷第九

隋天竺三藏闍那崛多译

从园还城品第七之二

尔时。迦毗罗城有诸释种五百大臣。皆悉是于菩萨眷属。还复造立五百精舍。拟菩萨坐。当于菩萨初入城时。各各立在自家门前。以欢喜心合掌恭敬。而作是言：愿天中天入我精舍。愿大船师入我精舍。愿身金色清净众生入我精舍。愿施一切欢喜心者入我精舍。愿名远闻无毁缺者入我精舍。愿德最尊无等等者入我精舍。

时净饭王为如是等五百亲眷生怜愍故。将于菩萨。次第巡历。入其精舍。悉皆周遍。然后始将入于自宫。

尔时菩萨当生之日。即有五百诸释种子同日而生。菩萨巍巍。最为初首。

复有五百诸释种女。亦同日生。耶输陀罗而为上首。
复有五百诸释奴仆。亦同日生净饭王宫。车匿为首。
复有五百释种婢媵。亦同日生净饭王宫。侍卫太子。
复有五百鲜白马驹。亦同日生净饭王厩。犍陟为首。
复有五百大香象王。色白如雪。齐有六牙。在王宫门。
忽然而现。

复有五百大巨伏藏。周匝四面。绕迦毗罗。自然而现。
复有五百妙好园林。流泉浴池。种种花果皆悉遍满。并
现在于迦毗罗城。四面周匝。悉是太子威德力故。

复有五百大商贾主。积诸钱财。多饶珍宝。相随来诣迦
毗罗城。

复有五百微妙伞盖。五百金瓶。并是五百粟散诸王遣使
送来。上净饭王。作如是言：今以是物奉献大王。庆贺太子。

复有五千诸婆罗门及刹利种大富长者。各持己女。将来
奉上于净饭王。时净饭王凡所须者。皆悉备具。

时净饭王自心思惟：我生太子。今作何名？复更思惟：
彼生之日。一切众事。皆悉自成。今我可为太子立名。名为
成利。

时净饭王即开藏出百亿两金。供养成利。为立名字。是
故偈言：

如是王宫内 众事悉丰饶
今作太子名 应当名成利

相师占看品第八之一

时净饭王即召相师解占观者。呼使前来。令看太子。作
如是言：汝诸相师婆罗门等占是太子。在我族中为好为恶。
汝等好看吉凶之相。

是时。诸相师婆罗门等闻王敕已。一心瞻仰太子形容。各依先圣所有诸论。共相量宜。量宜讫已。白于王言：大王！今者大得众利。何以故？此太子者。有大威德。是大众生。今生王家。大王当知。此太子身有三十二大丈夫相。凡有一人具三十二丈夫相者。于世间中。则有二种果报不差。更无余异。何等为二？一若在家受世乐者。则得作于转轮圣王。王四天下。护持大地。七宝具足。乃至不用刀杖化人。自然如法。遍于海内。若舍王位出家学道。得成如来、应正遍知。名称远闻。充满世界。

时净饭王闻是记已。复更重问婆罗门言：太子何处是大丈夫三十二相？

婆罗门言：三十二种大人相者。一者太子足下安立皆悉平满。二者太子双足下有千辐轮相。端正处中。可喜清淨。三者太子手指纤长。四者太子足跟圆好。五者太子足趺高隆。六者太子手足柔软。七者太子手足指间具足罗网。八者太子腩如鹿王。九者太子正立不曲。二手过膝。十者太子阴马藏相。十一太子皮肤一孔一毛旋生。十二太子身毛上靡。十三太子皮肤细软如兜罗绵。十四太子身毛金色。十五太子身体淳淨。十六太子口中深好可喜方正。十七太子颊车方正如狮子王。十八太子两胫广阔。十九太子身体上下纵横正等。如尼拘树。二十太子七处满好。二十一者具四十齿。二十二者诸齿齐密。二十三者齿不疏缺。不齲不齧。二十四者四牙白淨。二十五者身体清淨。纯黄金色。二十六者声如梵王。二十七者舌广长大。柔软红薄。二十八者所食之物皆为上味。二十九者眼目紺青。其三十者。太子眉眼睫如牛王。三十一者。眉间白毫右旋宛转。具足柔软。清淨光鲜。三十二者。顶上肉髻高广平好。大王！此是太子三十二种大丈夫相。如

是具足。若有一人具足此等丈夫相者。是人所得二种果报。在家出家。如上所说。

时净饭王闻诸相师说是语已。心大欢喜。遍体踊跃。不能自胜。即出种种百味饮食。设彼相师婆罗门等。令其自恣。随意饱满。复以种种杂妙衣服、种种诸宝及余资财而布施之。

时净饭王于迦毗罗大城之内。四衢道头及诸街巷。处处遍满。立无遮会。凡所须物。皆悉给与。须食与食。须饮与饮。须衣与衣。须香与香。须床敷与床敷。须房舍与房舍。须资财与资财。须驮乘与驮乘。所有功德皆悉回施。并为资益于太子身。

是时菩萨在天臂城岚毗尼园。从于母胎初出生时。正忆正念。放大光明遍满世界。又此大地六种震动。备十八相。

尔时。地居诸天诸仙见此瑞已。欢喜遍身。不自胜持。扬声叫唤。发大语言：今日阎浮岚毗尼中。菩萨出生。为于一切天人世间作大安乐。为诸无明黑暗众生作大光照。

时四天王闻彼地居诸天诸仙发大声已。其四天王所在诸天。传闻此语。复大欢喜。发大音声。戏弄衣裳。作如是言：今于人中菩萨出生。为诸世间安乐明故。

三十三天闻四天王叫唤音声。亦大欢喜。如是乃至须夜摩天从忉利闻。至兜率陀从夜摩闻。化乐天从兜率闻。他化自在从化乐闻。辗转复至色界梵天从他化闻。梵众天从梵天处闻。梵辅天从梵众天闻。大梵天从梵辅天闻。光天从彼大梵天闻。少光从彼光天处闻。无量光天从少光闻。光音天从无量光闻。净天从彼光音天闻。少净天从净天处闻。无量净天从少净闻。遍净天从无量净闻。广天从彼遍净天闻。从于广天至少广天。从少广天至无量广。从无量广至广果天。从广果天至于热天。从于热天至无热天。从无热天至无比天。

从无比天至善现天。从善现天如是次第。一刹那顷。乃至至于阿迦尼吒。一切诸天各各唱言：今日菩萨生于世间。为于天人作大安乐。为于黑暗盲冥众生作大灯明。

尔时。有一阿私陀仙。在三十三天上安居。见彼诸天欢喜踊跃。不能自胜。或弄衣裳。扬声如前。见已即问彼诸天言：仁者大德！三十三天今以何故欢喜踊跃。遍满身中。不能自胜。复大叫唤。手弄衣冠？

说是语已。三十三天报彼仙人阿私陀言：阿私陀仙！大德不闻？今人世间阎浮提地。当于北方雪山之下。有释种城名迦毗罗。彼城有王名为净饭。彼王最大夫人生子。极大端正。可喜绝殊。身色黄金。头如伞盖。鼻高圆直。两臂下垂。形体端严。六根具足。处处皆充。如铸金铤。具三十二大丈夫相。备八十种微妙之好。大仙！彼之菩萨决定得成阿耨多罗三藐三菩提。成已决定转于无上清净法轮。而彼菩萨能于一切天、人、魔、梵、沙门、婆罗门等诸世间中。自证诸通。证诸通已。阐扬正法。其法秘密。初中后善。义味深妙。具足说于清净梵行。彼说法时。所有一切诸众生等。以闻法故。有生法者。断绝生法。受老法者。断其老法。受病法者。得断病法。受死法者。得断死法。忧愁苦恼悉得断除。灭其根本。

阿私陀仙从彼三十三天闻已。心生重信。即于彼天隐身来下。现增长林。

尔时。复有说如是言：南天竺地。有一城名优禅耶尼。去城不远。山名频陀。于其中间更有一山。名阿私陀。是时仙人于彼山居。以彼山故。即称仙人名阿私陀。其仙人从忉利天下、在彼山时。阿私陀仙将一侍者。名那罗陀。从彼山中。隐身来此迦毗罗城。去城不远。下而立住。作是思惟：

我昔于此迦毗罗城。闻众国师及婆罗门云。净饭王生菩萨子。彼是天人及我等师。不得轻忽。若我今于迦毗罗城现神通入。无有此理。何以故？迦毗罗城不同往昔。今日若往。应当更现其余异相。我应敬彼如事尊神。我宁步行入彼城内。

时阿私陀及其侍者那罗陀身徒步共入迦毗罗城。从小巷里。私窃欲向净饭王所。到宫门前。时迦毗罗人民稠闹。处处遍满间无有空。为菩萨故作大庄严。

时诸大众见彼仙人步行而来。入迦毗罗。复从小巷。趣向净饭大王宫门。见已。无量无边人民云雨而集。随逐仙人。心生惊愕。怪不敢问：以何义故仙人至此。

时彼大众城内人民。或在自家门前而立。或在窗边。或倚构栏。或在台头。或在屋上。观彼仙人。各相谓言：往昔此仙来入迦毗罗婆城时。乘大神通。腾空而行。到于净饭大王宫中。今日步行而来入城。我等不知以何义故。步涉而来。

时阿私陀至净饭王宫门前已。语当门人。作如是言：我婆罗门。久来耆耄。犹如祖父。今日步行。翻似年少二十小儿。及那罗陀童子而来。其那罗陀。年始八岁。汝可为我白净饭王。

时守门者语仙人言：如尊者教。我当奉咨！

即入宫门。渐渐而行。到于王前。具以白王。

时净饭王闻此语已。心大敬仰。欢喜无量。即从座起。语彼通事守门人言：汝急疾引仙人将来。勿使淹迟！

时守门者还仙人所而作是言：大仙知时。宜速入宫。

时阿私陀闻彼语已。即共侍者那罗陀。入净饭王宫。

时净饭王遥在殿见阿私陀仙渐渐而行。将至王所。是时大王即从座起。诣仙人所。承事迎接。扶持其腋。将好最胜

最妙第一希有宝座。安置令坐。坐已礼拜。口唱是言：我今恭敬礼拜尊者。

是时仙人。口即咒愿净饭王言：唯愿大王常得安乐！

时净饭王白仙人言：尊者何求。故屈到此？为须衣耶？为须食乎？为复求须其余诸事？须者但道。我悉备具。必与不违。

时阿私陀咨白王言：大王当知。今我来者。无所乏少。不求衣食。一切诸事悉所不须。然我今者故从远来。欲见大王最胜童子。大王慈恩。愿当示我善胜童子。

是时。童子在于宝座睡卧眠寢。净饭王语阿私陀言：尊者大仙！少时留心。童子今眠。犹未觉寤。愿待须臾。

时阿私陀即白王言：大王！莫说如是语言。称童子睡。何以故？我等虽寤。犹如睡人。大王！童子久来断除、无复眠睡。昼夜恒为诸众生等得安乐故、大利益故而入禅定。

时净饭王知童子眠寤时欲至。即入宫内。敕令庄严宫舍殿堂。净水洒地。扫除粪秽。香水重洒。花散其上。在在处处。安置香炉。烧杂妙香。复悬种种繒彩幡盖、垂诸旒苏。竖大宝幢。复悬无量真珠璎珞、真珠罗网。种种宝铃垂覆其上。悬众杂宝。犹如日月星宿之光。复挂种种妙宝衣裳。喻如飞天。手持花璎。复悬杂色朱紫红黄种种众毼。诸如是等校饰精丽。庄严宫中。如乾闥城。一种无异。

复召释种内外眷属。最大最胜威德尊者。令来入宫。使共摩耶夫人一处。

是时摩耶诣童子所。至已。持手抱童子头。令向仙人拟如礼拜仙人之足。是时。童子威德力故。其身自转。足向仙人。

时净饭王更复共扶回童子头。令拜仙人。童子力故。足还自转向彼仙人。

时净饭王复回童子头向仙人。还复转足。如是至三。其阿私陀遥见童子。是时童子放常光明。照触大地。童子威德。端正可喜。色纯黄金。头如宝盖。鼻直而圆。修臂下垂。肢节正等。无缺无减。具足庄严。

时阿私陀即从座起。白于王言：大王！莫将童子圣头回向于我。何以故？彼头不合顶礼我足。我头应当顶礼彼足。复唱是言：希有希有！大人出世！最大希有！大人出世！我本从天所闻之者。即此童子。真实定是。如彼不异。

时阿私陀整理衣服。偏袒右臂。右膝著地。伸其两手。抱持童子。安其顶上。还复本座。本座坐已。还下童子。置于膝上。

是时。摩耶国大夫人即白大仙阿私陀言：仁者尊师！当令童子礼大仙足。

阿私陀仙报夫人言：国大夫人！莫作是语！今是童子不应礼我。我及一切诸天世人。应当接足礼拜童子。

时净饭王即持种种杂妙珍宝。以用嚩施阿私陀仙。时阿私陀持自澡罐。以水洗手。受此施物。受已。即持回奉童子。

时净饭王白阿私陀大仙人言：尊者大仙！我以此物施于尊者。唯愿纳受。

仙人报言：大王施我。我今回施最胜童子。

净饭王言：我知大仙福田胜故。供养大师。

阿私陀仙复报王言：我今见是胜因缘故。回施童子。

净饭王言：大圣尊仙！我今不解尊师此意。

仙人复言：大王当知。我今身心。深自归伏于此童子。

净饭王言：何因何缘？愿为解释。

时阿私陀即报王言：大王谛心善听是义。我当为王说其本末。大王当知。我昔在于忉利天上安居行道。忽见忉利一切诸天。欢喜踊跃。充遍其身。不能自胜。舞弄衣冠。跳踯悦豫。我时于彼即便问言：诸天仁者！何因何缘欢喜腾跃。不能自胜。执持衣冠。舞弄踟躅。

作是语已。忉利诸天即答我言：大德仙人！汝今知不？于下世间北方地内雪山之下。有释种城名迦毗罗。彼城有王名为净饭。彼王最大第一夫人。产一童子。端正可喜。人所乐见。身黄金色。头圆鼻直。足满臂长。犹如金像。备具三十二大人相、八十种好。必定得成阿耨多罗三藐三菩提。当转无上清净法轮。今此童子相貌具足。决是无疑。今此童子以自神力。能知此世及以过去未来世等天人魔梵、沙门婆罗门等一切世间。自证知己。分别法相。乃至略说。种种苦恼可解脱者。令得解脱。

大王！我于彼时闻是语已。故来至此。观看童子。

时净饭王报仙人言：若如是者。大怜愍我。大饶益我。无复忧愁。更有何法过四种行。四行过已。能胜能最。今此童子既人所生。能于未来得无上道。

阿私陀仙复白王言：大王当知。彼等一切诸婆罗门。在在处处。云何得胜而证知耶？

时净饭王复更咨白于仙人言：我今在于大仙之前。愿为解说。令我乐闻。

时阿私陀答言：大王！如我相传婆罗门家四毗陀经说。往昔有一婆罗门。名曰羖羊。复有婆罗门。名拔迦利。复有婆罗门。名拔伽婆。复有婆罗门。名末檀地。复有婆罗门。名迦吒啰唎。复有婆罗门。名般适尸弃。彼等皆得阿修罗王算计之法。得胜得上。复有仙人。名阿帝利耶。复有一王。

名钵啰摩檀那。复有一王。名阍那迦。此等诸人。皆得除灭身苦方便。大王当知。如是如是。今此童子虽生人间。而过于人。得胜人法。大王！往昔复有一王。名婆伽罗。大海滂涛。波浪如山。甚难得渡。非祖非父。彼身能渡。大王！诸如是等。虽生人间。有大威德。以威德故。过诸天人。

时净饭王报仙人言：若如尊师所宣说者。我无有疑。但我爱子。其心狭劣。故生惊恐。

阿私陀仙复语王言：大王所有心狐疑者。今可咨问。悉为决之。

时净饭王白言：大师！我实怀疑。如彼往昔。有调浮王、多罗求王、知离婆王、达离波王。诸如是等。不曾得见。不曾得知。我此童子。云何得知、得见此事？愿说因缘。

时阿私陀复报王言：大王！我亦知王有是疑惑。不得言无。何以故？大王但闻他所说事。以意消息。筹量取之。用自决疑。凡其前后所作诸王。未必一向有于证验。大王！彼等诸王。子及父祖。胜劣不同。是故大王。不可种姓独取其胜。不可以家独取其胜。不可以先生故而胜。后为不如。或有后出而胜先生大王。譬如天晓之时。先现明相。然后出日。论其明相。未能照明。其日后出。普光大地。破一切暗。无有遗余。大王！世间如是如是。或时生子。胜父胜祖。

时净饭王白仙人言：大德尊师！善以譬喻证明于事。慰解于我。令得决疑。心大安稳。大仙尊师！善摄受我。

时阿私陀复白王言：大王当知。我齿衰迈。余残无几。今此童子。幼稚少年。春秋方盛。长大成就。当向山林。出家学道。恨我朽耄。不覩慈颜。

时净饭王白仙人言：大仙尊师！今是童子决出家耶？

阿私陀仙报于王言：大王今者不须疑虑。

时净饭王回头顾视。看国师面。

时阿私陀问于王言：大王内心欲作何语？

净饭王言：大德尊仙！此我国师婆罗门等曾语我言：今此童子必定得作转轮圣王。

阿私陀仙复白王言：大王！如我意者。终不虚妄。我今所语。诚实至真。

时净饭王闻是语已。复更白言：大仙尊师！若审然者。乃令我心更大忧愁。切割我心。肝肠恼沸。

时阿私陀复报王言：大王智慧。勿作是言！大王往昔高曾祖父。以行福业功德缘故。得度众生到于彼岸。如是匠导。托作王儿。不但独为治化人民、令得安乐而为王子。

时净饭王复白仙言：大师！我意亦然。思惟如是。今此童子。种我王世。荷负重担。代我所忧。我至老年。出家入山。当修古道。

时净饭王复白仙言：大师！我意欲令我子常在。云何方便。及今幼年。勿使舍我？

阿私陀仙复白王言：大王！我实不能专正决定说是方便。令作障碍。

时净饭王复语仙人。作如是言：大师善听！我今当作种种方便。设方便已。不令我子。从今幼稚及到盛年。不听暂离、舍我出家。

阿私陀仙即问王言：大王今者因何事故说如是语？

时净饭王报彼仙人阿私陀言：尊师当知。如我国内所有相师婆罗门等皆语我言：若是童子在家。当作转轮圣王。以是因缘。我如是语。

阿私陀仙复白王言：大王当知。彼等相师皆大妄语。何以故？如是胜相。非是转轮圣王之相。今此童子有百善相。八十随形挺特殊好。分明炳著。皆悉具足。

时净饭王问仙人言：大师！何等是此童子八十随形之好？

时阿私陀具白王言：大王当知。今此童子。两手掌内。有金刚文。

大王！今是童子。诸指爪甲薄而且软。

大王！今是童子。诸指爪甲。其色赤红犹如铜鍱。

大王！今是童子。诸指爪甲悉皆润泽。

大王！今是童子。诸指妙色。

大王！今是童子。诸指皆傭。

大王！今是童子。踝骨不现。

大王！今是童子。两膝团圆。有大光液。

大王！今是童子。进止雍容。安详徐步。

大王！是童子行。如狮子王。

大王！是童子行。犹如牛王。

大王！是童子行。犹如鹅王。

大王！是童子行。安详徐步。犹如耳瑯。

大王！是童子行。安详如住。

大王！是童子身。形体挺直。

大王！是童子身。形体柔软。

大王！是童子身。形体滑泽。

大王！是童子身。肤体上充。

大王！是童子身。出妙薰香。

大王！是童子身。肤体无上。

大王！是童子身。肤体整肃。

大王！是童子身。肢节分解。各自分明。
大王！是童子身。肤体显现。如大梵王。
大王！是童子身。肤体无戾。
大王！是童子身。肤体清淨。无有黑黢。
大王！是童子身。无有诸病。
大王！是童子身。圆满正等。
大王！是童子身。七处齐满。
大王！是童子身。具足诸好。
大王！是童子身。遍体端正。
大王！是童子身。行处淳淨。
大王！是童子身。最胜无垢。诸毛清淨。
大王！是童子身。无有垢障。能出淨光。
大王！是童子身。常光一寻。
大王！是童子腰。犹如弓弣。
大王！是童子腹。无有破坏（谓其皮不皱褶等）。
大王！是童子脐。深隐妙好。
大王！是童子脐。团圆不散。
大王！是童子脐。犹如车轮。
大王！是童子脐。分明右旋。
大王！是童子手。不粗不涩。
大王！是童子手。如兜罗绵。
大王！是童子手。掌心之中。文理画深。
大王！是童子手。文理册画。柔软光泽。
大王！是童子手。文不破散。
大王！是童子手。所有册文。分明次第（竺本分明显现）。
大王！是童子手。两腕阔大。
大王！是童子头。犹如踝骨。

大王！是童子口。唇色犹如频婆罗果。
大王！是童子面。颜貌寂静。
大王！是童子舌。薄而且长。如赤铜色。
大王！是童子声。深而清亮。

佛本行集经卷第九

佛本行集经卷第十

隋天竺三藏阁那崛多译

相师占看品第八之二

大王！是童子音。言语哀美。清扬远震。
大王！是童子口。四牙广大。
大王！是童子牙。悉皆锋利。
大王！是童子牙。不缺不破。
大王！是童子鼻。端立圆直。如鹦鹉鸟。
大王！是童子眉。齐平而密。
大王！是童子耳。穿环垂埤。
大王！是童子耳。不乖不戾。
大王！是童子耳。不粗不涩。
大王！是童子眼。无有缺减。
大王！是童子眼。无有伤损。
大王！是童子身。诸根寂定。
大王！是童子面。额最胜上。
大王！是童子发。纯紺青色。

大王！是童子头。发色润泽。

大王！是童子发。不粗不涩。

大王！是童子发。不稠而厚。

大王！是童子发。齐而细密。

大王！是童子发。不缺不破。

大王！是童子发。髻卷而旋。

大王！是童子发。圆而右旋。状如卍字。

大王！是童子头。其上肉髻。犹如山顶。

大王！是童子头。颅颞坚硬。

大王！是童子顶。若人非人。不可破坏。

大王！是童子顶。巍巍甚高。无人能见（本缺三好）。

大王！若有一人。身体具足三十二大丈夫之相。复有如是八十种好。彼人一向决定得成阿耨多罗三藐三菩提。得菩提已。转于无上最妙法轮。

尔时。尊者阿私陀仙为王说已。作是思惟：今此童子几时出家。得成佛道。转于最上胜妙法轮？彼作如是思惟之时。自心生智。即能知见。从今以去三十五年。此之童子必得成于阿耨多罗三藐三菩提。转于无上最胜法轮。

时彼仙人因此系念思惟之时。复自见己诸根纯熟。覆自呵责。如是叹言：呜呼呜呼！我今在于如是童子法教之外。不值此时。如是观已。悲号啼哭。嘘唏哽咽。泪流满面。

时净饭王见阿私陀仙人如是啼哭懊恼。不能自胜。王亦悲哀。失声而哭。摩耶夫人。既见是已。亦复流泪。哽塞呜咽。彼诸释种大臣眷属。皆各号啕。失声叫吼。宫内大小。亦悉悲啼。流涕如雨。

时净饭王涕泪交横。潸然满面。白阿私陀大仙人言：大德尊师！此之童子初欲生时。即有五百释种童子。同日而生。

略说乃至五百童女同日而生。五百奴仆、五百婢媵、五百马驹。五百白象、皆悉六牙。一时同日集宫门外。五百伏藏自然涌出。五百园林在迦毗罗城之四面自然而现。五百商主从诸方来。迦毗罗城五百伞盖、五百金瓶。外方诸王、邻境珠珍。悉来送我。复跪拜我。复有一万天诸童女。并在长者及婆罗门、刹利家生。大仙尊师。童子生日。我一切利皆悉得成。我心愿者皆满具足。我唤国内诸善解相婆罗门等。明吉凶者。悉皆召集。彼等见此童子形容。皆大欢喜。踊跃充遍。不能自胜。唯独尊师。今见童子。何故悲啼？何故流泪？而令我等眷属狐疑。大师为我辩说此由。为我童子有于灾祸不祥事乎？为自身崇。为从外来？

时阿私陀见净饭王涕泪交脸。愁忧怅快。而白王言：大王今者莫愁莫忧。所以者何？我今非是见于童子有灾有变。亦不见有诸余苦恼。不见身内及外不祥。大王当知。今此童子长寿巍巍。有大威德。端正可喜。黄白金容。顶如伞盖。鼻若截筒。身体洪满。肢节自称。犹如金像。身有三十二丈夫相。大王！此之童子。兼有八十微妙种好。大王！如是诸相。非是转轮圣王之种。大王！如是相者。皆是诸佛菩萨之相。大王！是故我见童子。决定得成阿耨多罗三藐三菩提。转于无上清净法轮。为彼诸天世间人等说法。安乐一切众生。而彼法宝。初中后善。乃至说于清净梵行。若于是边听受法已。应生众生。即断生法。应老众生。即断老法。应病断病。应死断死。忧悲苦恼一切众生。皆蒙解脱。大王！我今自慨年耆根熟。衰朽老迈。当于尔时。不得睹见。失此大利。是故我今悲惋自伤。非彼不吉。即为大王而说偈言：

自恨我有大颠倒 不值此当得道时
空过一生无所闻 岂非是我失大利

我今年老根纯熟 死时将至不复奢
念此生分得遭逢 所以一喜一忧惧
大王释种方兴盛 诞此童子福德人
一切诸苦逼世间 此悉能令得安乐

大王！无量无边诸众生等。为贪恚痴诸烦恼时。此当能灭。能与微妙甘露法水。无量无边诸恶众生。已入邪见旷野泽中。不见正道、迷惑之时。此当能与淳直涅槃平坦好道。无量无边诸苦众生。闭在烦恼牢狱之中。此当能解一切业缚。无量无边愚昧众生。长夜昏暗。覆翳重盲。此当为生大智慧眼。无量无边染著众生。以被烦恼毒箭所射。此当拔济。令免其苦。我今年垂。身心退败。慨恨彼时不见此法。是以啼泣。

大王！如优昙花。无量无边亿千万年。时一出现。诸佛如是。无量无边千万亿劫。出世甚难。

大王！今此童子。决定得成阿耨多罗三藐三菩提。决定转于无上法轮。我自伤过。不值此时。今当背彼。是故悲泣。

大王！彼等众生。大得财利。大得福业。若能见此大圣童子在彼地方菩提树下。坐降四魔。能得睹者。彼等众生。大得善利。大得度脱。

大王！若能见此大圣童子得菩提已。渐渐至于波罗奈国。当转无上最妙法轮。一切众生。大获胜果。

大王！此之童子。庄严清静。是阎浮提诸圣沙门。皆悉教令得阿罗汉。作其弟子。是故我啼。

大王！彼等众生。善得人身。善来此世。大得财利。大种福业。又复得见童子至于三十三天。诸天围绕。乘七宝梯。而下彼处。无量无边众生礼拜。

大王！王今亦善得此人身。大得财利及以法利。若王当见自子得道。于天人中说是妙法。获证无疑。

私陀问瑞品第九

时净饭王从彼仙人阿私陀边闻此语已。生大欢喜。即从座起。整理衣服。右膝著地。合十指掌。向于仙人。欢喜倍常。得未曾有。遍身毛竖。顶礼其足。却住一面。将二十具上妙衣裳。布施仙人。

时阿私陀于所施衣二十具中。唯受一具称己用者而为受之。受一具已。自余诸衣。还持回施于净饭王而作是言：大王当知。我出家人。婆罗门种。无多威德。少欲无求。应须知足。大王国主赐赉处宽。财物有限。当任意用。自他已然。大王！童子在于母胎。希有之事。理应无边。生育以前所有瑞相。唯愿大王为我尽说。我得闻已。是大布施。令我欢喜。踊跃充遍。不能自胜。此则是我大得财宝。

时净饭王白仙人言：圣师谛听。专心谛受。我为圣师次第而说童子在胎希奇之事、未曾有法。及童子生所有异相。我悉说之。

大仙尊师。我念一时。童子之母在于楼上。卧妙床敷。睡眠之中。安详觉起而语我言：大王！听我梦所见事。今向王说。我于昨夜。梦见有一白象六牙。身鲜头赤。七肢拄地。形体端严。然其六牙。皆是金装。飞行虚空。从北方来。入我右胁。入已。我身即受快乐。快乐希有。于世间中无物可喻。耳不曾闻。又快乐来。于世间事我心不乐。亦不更愿共于大王一处受乐。一切五欲皆悉愿舍。

大仙尊师！我于彼时。即广召唤诸婆罗门。有能占相。善谳先典。依经据书。而教变出。即语之言：我大夫人。夜所梦见。事相如前。果报云何？为我解说。

是时。一切诸婆罗门即依先书诸圣所说。占此梦相而白我言：大王今可特意欢喜！是梦大善。大有吉祥！此大夫人必生童子。于世间中大得名闻。天下最尊。无有双匹。

时我闻是诸婆罗门如是语已。设大美食。持好财宝布施彼等而发遣之。我于彼时在此城内。所有街陌、四衢道头。或复坊巷。随有处立大无遮会。所有财宝皆悉布施。须食与食。乃至资生。五行调度。皆令满足。愿此功德。回施童子。庄严其身。

复次。大师！童子在胎。有四天王来至我家。在于四方。各严守护童子之母。

复次。大师！童子在胎。童子之母受大快乐。身体敷愉。无疲无倦。

复次。大师！童子在胎。母常持戒。诸根调伏。无有嗔恨。

复次。大师！童子在胎。童子之母无有欲心。亦不曾为欲心所恼。身口唯行清净梵行。

复次。大师！童子在胎。童子之母不患寒热、不苦饥渴。

复次。大师！童子在胎。其母庶几。所有钱财、珍奇宝物。人所须者。恣意与之。心生欢喜。不生悭吝。

复次。大师！童子在胎。其母恒行慈悲、怜愍于一切命。

复次。大师！童子在胎。童子之母端正可喜。世无有双。先时光泽。倍更增进。转胜于前。

复次。大师！童子在胎。其母欲观童子之时。即见童子。在于胎内。身体洪满。诸根完具。可喜端正。犹如净镜。见其面像。母见此已。生大欢喜。踊跃遍身。不能自胜。

复次。大师！童子在胎。诸有病人来欲到于童子母所。其童子母以手摩触。或以草叶。或持树叶。送于彼边。彼等众生皆得安乐。身体无患。无诸苦恼。

大师！童子在胎。有如是等无量种种希奇之事、未曾有法。

复次。大师！时童子母摩耶夫人。父善觉释遣使语我。大王知时。我女怀孕。此胜众生。威德甚大。若彼出已。我女不久。必取命终。我意今者欲唤自女。来向我园岚毗尼中。共我相娱受于快乐。亦望是处得保吉祥。唯愿大王善好发遣。

我闻彼使如是语已。即时宣告。严驾发遣摩耶夫人。乃至从此迦毗罗城。到彼天臂两城中间。耘除一切荆棘砂砾。种种粪秽。皆令清净。香汤洒地。持诸妙花而散其上。饰童子母。以诸妙香、诸种花鬘庄严其身。作诸音乐。持王势力。持王威神。及其宫内一切嫔女。前后围绕。乘大白象。归向善觉天臂城中。

其童子母摩耶夫人。遥见迎来。即持种种无量无边庄严之具。相随共入岚毗尼园。逍遥娱乐。时童子母摩耶夫人从白象下。宫内嫔女左右围绕。前后侍卫。安详进入岚毗尼园。观视林树。从此树下。如是次第。到波罗叉树下之时。伸举右手。攀彼树枝。安详而息。

是时童子见于其母摩耶夫人手攀枝已。从彼胎中一心正念。安详徐起。从右肋出。其母右肋亦无疼痛。亦无患难。不擘不裂。

是时童子右肋生时。身放大光。照耀世间。

大师！是名童子在母胎内、初生之时。有如是等希奇之事、未曾有法。

复次。大师！童子在胎。不忧不愁。从其胎内。安详徐起。身体鲜净。不为种种涕唾痰癢、屎尿淤血之所秽污。

复次。大师！童子初从胎内出时。一切诸天以迦尸迦缠裹其身。怀抱执持。将向母前而语母言：大德夫人！今应欢喜。夫人今日生于圣子。天人中尊。

复次。大师！童子初生。无人扶持。住立于地。各行七步。凡所履处。皆生莲花。顾视四方。目不曾瞬。不畏不惊。住于东面。不似孩童呱呱啼叫。言音周正。巧妙辞章而说是言：一切世间。唯我独尊。唯我最胜。我今当断生老死根。

复次。大师！童子生时。即于是处。忽有二池。一暖一冷。随童子母恣意取用。上界虚空复流二水。冷暖如前。洗浴童子。

复次。大师！童子生时。有真金榻。坐童子身。令童子浴。

复次。大师！童子生时。身放光明。翳障一切诸宝、火焰一切光明。

复次。大师！童子生时。身放光明。蔽日月光。状如星宿。

复次。大师！童子生时。一切树木随时敷荣。花果茂盛。非时诸树亦复开鲜。

复次。大师！童子生时。虚空诸天持其白盖。真金为柄。覆童子上。

复次。大师！童子生时。虚空诸天复持白拂。摩尼为柄。拂童子上。

复次。大师！童子生时。虚空清净。无云无雾及诸烟尘。但闻雷声。

复次。大师！童子生时。虚空无云而下细雨。清净妙水。八味具足。

复次。大师！童子生时。一切诸方。凉风忽起。其风调适。不为恼患。诸方清净。无有烟云及诸氛翳。

复次。大师！童子生时。于上空中出大梵声。非人所作。自然而响。

复次。大师！童子生时。于童子上自然而有无量音声。非人所作。复闻无量歌乐之声。复雨无量种种花香。日光所照。常鲜不异。

复次。大师！童子生时。于上虚空。一切诸天雨于种种天诸妙花。优钵罗花、分陀利花、拘勿头花、波头摩花。复持无量种种末香。复持无量种种殊妙最胜花鬘散童子上。散已更散。

复次。大师！童子生时。自然忽有无量无边诸天玉女。持种种香及种种油、涂香末香、天妙衣服、种种天乐。或歌或舞。出种种声。渐渐而行。诣向摩耶童子母前而问讯言：善生童子。得无疲倦！

复次。大师！童子生时。于此大地六种震动。十八相具。

复次。大师！童子生时。三千大千一切世界诸众生等。一时受乐。

复次。大师！童子生时。我得成就一切大利、种种吉祥。随我心愿。莫不具足。

复次。大师！彼时我臣婆私吒子摩诃那摩来向我边而语我言：唯愿大王常尊常胜。国大夫人产生清净最胜童子。

次有人来。复语我言：唯愿大王常胜一切。家室隆盛。于诸释种眷属之中。复各生于五百童子。

次有人来。复语我言：唯愿大王常满一切。今日释种眷属之中。复各生于五百童女。

次有人来。复语我言：乃至宫中。一时产生五百奴仆。

次有人来。复语我言：乃至产生五百婢媵。

次有人来。复语我言：乃至产生五百马驹。

次有人来。乃至自然五百香象。身白如雪。齐有六牙。在宫门外。

次有人来。乃至五百金藏隐伏。自然显现。

次有人来。乃至此处迦毗罗城。自然而有五百园林。忽尔出现。

次有人来。乃至他方五百商主。多赍财宝。来至于此迦毗罗城。

次有人来。乃至将于五百白盖、五百金瓶。粟散诸王送来奉献。并复遣人咨白我言：我等皆待大王教命。依敕而行。

次有人来而语我言：愿王常胜。有万童女。在于刹利及婆罗门长者家生。

大师！我于尔时如是思惟：我作何乘。将我童子安稳还向迦毗罗城？是时空中。有一天舆。七宝所成。非人工造。忽然而现。端正可喜。种种庄严。

大师！我于彼时作是思惟：谁负此舆？是时四方。自然而有四天子来。来已。各各担负宝舆。离地不远。乘空而行。我于尔时。将是童子入于宫殿。

覆复思惟：今我童子作何名也？我更思惟：其生之日。我一切利自然而成。我时知己。便作名字。号悉达多。

大师！尔时我复于此城内。诸有相师能占吉凶。一切召唤。示此童子令其观看。汝等一切诸婆罗门。为我好观此之童子。有何相貌。复有何怪。而相师等闻我语已。共瞻童子。各各相议而报我言：大王！汝得大利。如是童子有大威德。生大王家。具足三十二大人相。若当有人。具足如是丈夫相者。此人则有二种之行。若其在家。必定当作转轮圣王。王四天下。七宝具足。乃至不用一切兵戈。如法治化。若其舍家。修学圣道。必得作佛、多陀阿伽度、阿罗诃、三藐三佛陀。名闻遍满一切世间。

大师！我于尔时。将百味食。设彼一切诸婆罗门。皆悉充足。自恣布施种种衣服。

大师！我于彼时。在此城内。所有街巷、四衢道头。皆行布施。须食与食。资财五行。皆持施与。乃至所得诸功德者。回施童子。为供养故。

大师！童子在胎、初生之时。有如是等种种瑞相希奇之事、未曾有法。诸如是等在胎生法。我今具白大师令知。今奉大师如是布施。唯愿大师领受欢喜。

尔时。尊者阿私陀仙从童子父净饭王边。闻此微妙诸瑞相等。生大欢喜。不能自胜。从座而起。辞王出宫。步至门外。即以右手。执那罗陀童子左臂。从门隐身。腾虚而行。向南天竺。下阿槃提聚落之时。阿私陀仙语那罗陀童子。作是言：汝那罗陀童子！当知有佛。出现于今世间。汝当彼边。出家学道。修习梵行。久远之时。大得利益。大得安乐。

时阿私陀覆复思惟：我灭度后。所有利养、世间名闻。一切皆是那罗童子悉收敛得。是故此之那罗童子。因利养故、世名闻故。尽其道行。不得精进、不得正念、不得信行。于

三宝边。不能分别此是佛陀、此是达摩、此是僧伽。是故名闻损彼自身。

尔时。尊者阿私陀仙更复思惟：是净饭王悉达童子。在何国地。当得成于阿耨多罗三藐三菩提？复在何处转于清净无上法轮？如是少时思惟讫已。内心明见。知是童子其后于彼摩伽陀国。当得阿耨多罗三藐三菩提。波罗奈国转于法轮。我于今者。当应将此那罗童子。诣波罗奈。造一精舍。安置立已。昼日三时、暗夜三时。向彼为其说佛名号。汝那罗陀。佛出于世。汝那罗陀。佛出于世。如是三称。汝应彼边。出家修道。勤行梵行。汝当后时。有大利益。得大安乐。

时阿私陀作是念已。将那罗陀向波罗奈。为造精舍。安置立已。昼夜六时。作是唱言：汝那罗陀！佛兴于世。昼夜六时。如是三唱。汝当出家。乃至后时。得大安乐。时阿私陀如是方便。住世无量。而取寿终。

时阿私陀命终之后。其那罗陀侍者童子。于世间中得大利养、得大名闻。时那罗陀著世利养、贪名闻故。心不自定。不能增进。以求利养、不知足故。不能自念、不能自信、不能分别此是佛耶、此是法耶、此是僧耶。

彼阿私陀命终之后。时净饭王语诸国师婆罗门言：大师当知。今此太子既生王宫。不久必当行于圣行。证得圣道。犹如尊者大阿私陀仙人授记。此言真实。恐当不虚。必应如是。大师！我王种族。若为嗣立。当大损减。

其婆罗门诸国师报净饭王言：大王今者莫作是念。如我授记。此之太子必当定作转轮圣王。如我等语。终无有异。

时净饭王语国师言：仁等大师！汝于今者非阿私陀圣师之言。此语虚谬。

时彼国师婆罗门等更报王言：彼仙人语。若其不虚、言是实者。大王今应须作方便。及年少时。增益世事。当观太子著于何者。渐渐更加。如是则彼自爱家居。不向山林修于苦行。

时净饭王复问国师婆罗门言：此事云何？

时国师等复白王言：大王当知。往古诸仙。或饮风露。或食花果。或食根药。著树皮衣。少欲知足。彼等诸仙犹爱俗事。一著于世。尚生放逸。况复太子日日习近。一切诸根自然染著。以王势力具足功德。住在家内。能舍出家。无有是处。

时净饭王复作是言：此事如是。如大师语。世间亦有方便之事。如大师说。但彼大仙阿私陀说。必不虚言。是故我心常生疑惑。

时净饭王思惟如是未来之事。心疑犹豫。即集群臣诸释种族而告之言：我敕汝等。若见太子增长之时。莫向彼前说阿私陀授记之事。所以者何？太子若闻如此语者。其喜不舍菩提之心。

时净饭王复更重告诸臣等言：卿诸臣等！为我太子。国内所有禁系囚徒。皆悉放赦。令得解脱。乃至一切诸禽兽等。亦并放舍。

复告国师婆罗门言：大师！若知所有精进婆罗门等。或百或千。聚集之处。随意所须。悉皆布施。所有天祠。及神庙堂。皆令修治。依法祭祀。为我太子。令得大福。

尔时国师婆罗门等。即依王命。四方召得三万二千诸婆罗门。日别令入净饭王宫。所有资财悉持布施。满七日夜。所有功德。回施太子。愿令增进。而有偈说：

净饭王心大欢喜 以生福德太子故

一切群臣皆聚集	天下囚系普放恩
诞育既称适本心	殷重欲为作生法
持彼百千乳牛犊	皆金装角银饰蹄
年齿悉壮毛色鲜	各各从犊随其后
肤体充肥多乳汁	一头一捋得十斗
更有无量种珍奇	钱财谷帛诸杂物
为令太子增益故	布施于彼婆罗门

佛本行集经卷第十

佛本行集经卷第十一

隋天竺三藏闍那崛多译

姨母养育品第十

尔时太子既以诞生。适满七日。其太子母摩耶夫人更不能得诸天威力。复不能得太子在胎所受快乐。以力薄故。其形羸瘦。遂便命终。

或有师言：摩耶夫人寿命算数。唯在七日。是故命终。虽然。但往昔来常有是法。其菩萨生满七日已。而菩萨母皆取命终。何以故？以诸菩萨幼年出家。母见是事。其心碎裂。即便命终。

萨婆多师复作是言：其菩萨母见所生子。身体洪满。端正可喜。于世少双。既睹如是希奇之事、未曾有法。欢喜踊跃。遍满身中。以不胜故。即便命终。

尔时。摩耶国大夫人命终之后。即便往生忉利天上。生彼天已。即有胜妙无量无边诸天婇女。左右围绕。前后翼从。各各持于无量无边供养之具、曼陀罗等。诣菩萨所。处处遍

散。为欲供养于菩萨故。从虚空下。渐渐而坠。到于人间净饭王宫。到王宫已。语净饭王而作是言：大王当知。我得善利。善生人间。我于往昔。胎怀于彼清净众生大王童子。满足十月。受于快乐。今我生于三十三天。还受快乐。如前不异。彼乐此乐。一种无殊。大王！从今以往。愿莫为我受大忧苦。从今以去。我更不生。时彼摩耶即以天身而说偈言：

一切怨亲平等心	精进勇猛无暂息
善思真如实谛理	念无错乱有始终
形体炳著真金容	诸根寂静善调御
我子巧能说诸法	善行顶礼最胜尊

尔时摩耶说此偈已。即便隐身。忽然不现。还彼天宫。

时净饭王见其摩耶国大夫人命终之后。即便唤召诸释种亲年德长者。皆令云集而告之言：汝等眷属并是国亲。今是童子婴孩失母。乳哺之寄将付嘱谁、教令养育使得存活？谁能依时看视瞻护？谁能至心令善增长？谁能怜愍爱如己生。携抱捧持。以慈心故、功德心故、欢喜心故？

时有五百释种新妇。彼等新妇各各唱言：我能养育。我能瞻看。

时释种族语彼妇言：汝等一切年少盛壮。意耽色欲。汝等不能依时养育。亦复不能依法慈怜。唯此摩诃波阇波提。亲是童子真正姨母。是故堪能将息养育童子之身。亦复堪能奉事大王。彼诸释种一切和合。劝彼摩诃波阇波提为母养育。

时净饭王即将太子付嘱姨母摩诃波阇波提。以是太子亲姨母故。而告之言：善来夫人！如是童子。应当养育。善须护持。应令增长。依时澡浴。又别简取三十二女。令助养育。以八女人拟抱太子。以八女人洗浴太子。以八女人令乳太子。以八女人令其戏弄。

其净饭王产生二子。一者太子。字悉达多。二名难陀。
其白饭王亦有二子。第一名难提迦。第二名为婆提唎迦。
其斛饭王亦有二子。第一名阿难多。第二名为提婆达多。
甘露饭王亦有二子。第一名为阿尼卢豆。第二名为摩诃那摩。

净饭王妹。名阿弥多质多罗（此言甘露味）。生于一子。
名为底沙。

是时摩诃波阇波提、太子姨母白净饭王作如是言：谨依王敕。不敢乖违。

时波阇波提依于王命。养育太子。譬如日月。从初一日至十五日。清净圆满。养育太子亦复如是。渐渐增长。又复譬如尼拘陀树。得种好地而渐增长。后成大树。太子如是日日增长。从其太子出生以来。净饭王家日日增长一切财利。金银珍宝、二足四足。无所乏少。而说偈言：

五谷及财宝	金银诸衣服
或造或不造	自然得充足
童子及慈母	乳酪酥常丰
慈母少乳者	悉皆得盈溢

时净饭王所有怨仇。自然皆悉生平等心。平等心已。渐生亲厚。既生亲厚。共王同心。即便牢固。一心一意。同愿同行。

风雨随时。无诸灾雹。亦无扰乱。少种多收。彼诸苗稼。一切药草。树木园林。随色长色。诸香丰足。随味具味。依限成熟。终不过时。皆是太子威德力故。

一切城内所怀妊者。安稳得生。又诸人民。无众疫横。亦无夭死。以此太子威德力故。

侧近所有一切人民、长者居士。各各自守。不相求及。无此求彼。彼当与我。设令因事。所须少多。贷换假借。彼应多与。不生是念：须若干者。即与若干。城内人民。各各相尊。孝养父母。敬事师长。以是太子威德力故。亦如往昔。如法行行。一切诸王、人民士庶。皆依法行。悉持十善。具足而行。

国内无怖。五谷丰登。远离饥俭。如是如是。净饭王国。一切境内。无有饥俭。亦无惊怖。五谷丰饶。一切人民如法而行。种种布施作诸功德。造诸园林。造诸大义井泉池渠。皆悉自现天舍庙堂。曹局省府皆亦自然。人无枉横。一切人民皆并欢喜。犹如天上。无有差殊。以于太子威德力故。如是诸事。莫不成就。如偈所说。

人民顺尊教	不慳亦不惜
无不如法行	慈心不起杀
饥渴既得解	饮食皆充足
一切悉欢喜	并受如天乐

时净饭王过轸宿辰。取角宿日。为太子作众宝璎珞。所谓手腕指胫钏环、首饰杂宝、胜妙花鬘。颈系种种璎珞珠玑。印文指环。臂璫腰珮。金缕为带。金铃宝网。种种摩尼为庄严具。靴履革屣。杂宝庄严。其天宝冠。最胜殊妙。

复有五百释种诸亲。为于太子各造一具杂妙璎珞。如上庄严作已。将诣净饭王所。而白王言：善哉大王！我等所造此妙璎珞。七日七夜。唯愿大王以此璎珞庄严太子。当令我等不空疲劳。

时净饭王于其晨朝鬼宿之日。共一国师婆罗门。名优陀耶那。是优陀夷比丘之父。并及五百诸婆罗门。皆唱是言：

甚大吉祥！共将太子至彼一园。名曰无垢清净庄严。往昔以来。贵之如塔。

时彼园内。复有无量无边百千一切众生。男子妇人、童男童女。相唤云会。集聚彼园。欲观太子。

复更别驾一乘大车。载置种种璎珞金银、饮食衣服。悉令充备。于迦毗罗城内街术、四衢道头及诸小巷。诸如是处。设大布施。高声唱言：凡所须者。皆悉给与。如是驾在太子前行。

复有八千杂种音乐。作种种声。虚空自雨无量无边杂妙花雨。

复有无量百千诸女。皆以种种诸宝璎珞。庄饰其身。在于阁上。或在高台。或在却敌。或在城头。及女墙边。或城楼上。或窗牖中。或居堂脊。或立屋头。手执诸花。观看太子。以花逆散于太子前。

复有八千诸天宝女。手执扫帚。身体庄严。在太子先。耘除道路。一切释种眷属诸亲。并悉在于净饭王侧及太子前。次第而行。

是时。摩诃波闍波提怀抱太子。安置膝上。坐辇乘中。如是种种无量无边庄严备已。将引太子。往诣彼园。

尔时国师优陀夷父。共彼五百诸婆罗门。人人各以无量无边吉祥之言称赞太子。持诸璎珞。系太子身。系璎珞已。太子身相皆悉隐障彼之璎珞。并各昏暗。无复精光。犹如聚墨。不能照耀。无复光显。譬如无价阎浮檀金。欲于其边安置丸炭。如是如是。彼诸璎珞系太子已。犹如昼萤。不能自现。所有璎珞至太子身。不显不现。不照不耀。亦复如是。

时彼人众见此太子有如是等希奇之事、未曾有法。各各唱言：呜呼呜呼！希有希有！各各欢笑。人人拍手。歌舞叫啸。掷弄衣裳。

时彼园内有一天神。名曰离垢。然彼天神在于虚空。隐身不现而说偈言：

假使此大地	及城邑聚落
山河诸树木	皆成阎浮金
佛一毛孔光	具足威德相
翳彼如聚墨	百福庄严满
璎珞光相灭	若人具诸相
第一胜报果	不须璎珞严

时彼天神说此偈已。即持种种无量天花散太子上。还其本宫。

尔时。释种诸亲族等即持无价碎末栴檀及细磨者。杂色牙席。杂种诸药。具满诸器。持与太子。令庄严身。复持鹿车。真金为舆。种种船舫。诸杂野兽。乃至马驹。杂宝所作。具施太子。恣令嬉戏。具足八年。如是欢乐。娱乐太子。增长养育。然其不似世之婴孩。流涕不净。无诸粪秽。亦不呱呱啼。呻吟顰缩。不饥不渴。诸母养育。常生欢喜。

时净饭王作是思惟：今我太子端正少双。未知其力竟复何如。今可试看。验其强弱。

尔时。大王即共无量释种童子同坐饮食。持一纯金雕镂之钵。盛欢喜丸。具足充满。复以真金作诸环锁。置诸一切众童子前。教令争食。又复聚于诸小白象。令与童子共相竞食。语诸一切众童子言：汝等当知。如是白象将夺汝食。

时诸童子断众白象。争力不如。遂令象食。然后始语太子令知：太子！汝食今被他夺。

是时太子即以两手。执彼金钵。出少身力。而坏彼锁。令象却顿。不如太子。

时净饭王。复为太子多集羝羊。安置宫内。为令太子生欢喜故。真金为鞍。杂宝庄饰。种种璎珞以严其身。金罗网覆。

是时太子乘彼羊车。至于园林及其亲叔甘露饭等。自余诸释各为诸子庄诸羝羊。具足如前。彼诸童子亦乘羊车。随意游戏。

习学技艺品第十一

时净饭王知其太子年已八岁。即会百官群臣宰相而告之言：卿等当知。今我化内。谁最有智？谁具技能？种种悉通。堪为太子作于师匠。教使学书及余诸论？

时诸臣等即报王言：大王当知。今有毗奢婆蜜多罗。善知诸论。最胜最妙。如是大师。堪教太子种种书论。

时净饭王即遣使人。召彼毗奢婆蜜多罗而告之言：尊者大师！汝能为我教此太子一切技艺、诸书论不？

时蜜多罗报言：大王！谨依王命。我今甚能。

时净饭王心生欢喜。即占好日善宿吉时。共大释种耆旧有德。令其庄饰一切礼仪。种种所须悉令充备。复严五百诸释种童。前后左右。周匝围绕。更复别有无量无边童男童女。随从太子。将升学堂。

时彼大师毗奢蜜多遥见太子威德力大。不能自禁。遂使其身。从座忽起。屈身顶礼于太子足。礼拜起已。四面顾视。生大羞惭。时蜜多罗生惭愧已。于虚空中有一天子。名曰净妙。从兜率宫。共于无量无边最大诸天神王。恒常守护是太子者。在彼虚空。隐身不现而说偈言：

世间诸技艺	及余诸经论
此人悉能知	亦能教示他
是胜众生者	随顺世间故
往昔久习来	今示从师学
出世所有智	诸谛及诸力
因缘所生法	生已及灭无
一念知彼等	名色现不现
犹尚能证知	况复诸文字

尔时天子说此偈已。以种种花散太子上。即还本宫。

时净饭王即持种种无价珍宝。以用布施诸婆罗门。复持种种百味饮食。施設众座诸婆罗门。将是太子付彼大师毗奢蜜多。留诸乳母令侍太子。即还王宫。

尔时。太子既初就学。将好最妙牛头栴檀作于书板。纯用七宝庄严四缘。以天种种殊特妙香涂其背上。执持至于毗奢蜜多阿闍梨前。而作是言：

尊者闍梨。教我何书（梵本元少一书）。或复梵天所说之书（今婆罗门书正十四音是）。佉卢虱吒书（此言驴唇）。富沙迦罗仙人说书（此言莲花）。阿迦罗书（此言节分）。瞢伽罗书（此言吉祥）。耶寐尼书（此言大秦国书）。鸯瞿梨书（此言指书）。耶那尼迦书（此言驮乘）。娑伽婆书（此言犍牛）。波罗婆尼书（此言树叶）。波流沙书（此言恶言）。毗多荼书（此言起尸）。陀毗荼国书（此云南天竺）。脂罗低书（此言裸形人）。度其差那婆多书（此言右旋）。优伽书（此言严炽）。僧佉书（此言算计）。阿婆勿陀书（此言覆）。阿菟卢摩书（此言顺）。毗耶寐奢罗书（此言杂）。陀罗多书（乌场边山）。西瞿耶尼书（此土无）。珂沙书（疏勒）。脂那国书（中华国）。摩那书（斗升）。末荼叉罗书（中字）。毗多

悉底书（尺）。富数波书（花）。提婆书（天）。那伽书（龙）。夜叉书（此土不翻）。乾闥婆书（天音声）。阿修罗书（不饮酒）。迦楼罗书（金翅鸟）。紧那罗书（非人）。摩睺罗伽书（大蛇）。弥伽遮迦书（诸兽音）。迦迦娄多书（乌音）。浮摩提婆书（地居天）。安多梨叉提婆书（虚空天）。郁多罗拘卢书（须弥北）。逋娄婆毗提呵书（须弥东）。乌差波书（举）。腻差波书（掷）。娑伽罗书（海）。跋闍罗书（金刚）。梨伽波罗低梨伽书（往复）。毗弃多书（食残）。阿菟浮多书（未曾有）。奢娑多罗跋多书（如伏转）。伽那那跋多书（算转）。优差波跋多书（举转）。尼差波跋多书（掷转）。波陀梨佉书（上句）。毗拘多罗波陀那地书（从二增上句）。耶婆陀输多罗书（增十句以上）。末荼婆晒尼书（中流）。梨沙耶娑多波侈比多书（诸仙苦行）。陀罗尼卑叉梨书（观地）。伽伽那卑丽叉尼书（观虚空）。萨蒲沙地尼山陀书（一切药果目）。沙罗僧伽何尼书（总览）。萨婆娄多书（一切种音）。

尔时。太子说是书已。复咨蜜多阿闍梨言：此书凡有六十四种。未审尊欲教我何书？

是时毗奢婆蜜多罗闻于太子说是书已。内心欢喜。悦豫熙怡。密怀私惭。折伏贡高我慢之心。向于太子而说偈言：

希有清静智慧人	善顺于诸世间法
自己该通一切论	复更来入我学堂
如是书名我未知	其今悉皆诵持得
是为天人大尊导	今复更欲觅于师

尔时。复有五百释种诸臣童子。俱共太子齐入学堂学书唱字。以是太子威德力故。复有诸天神力加故。诸音响中出种种声。

唱阿字时。诸行无常。出如是声。

唱伊字时。一切诸根门户闭塞。出如是声。

唱优字时。心得寂定。出如是声。

唱咽字时。诸六入道皆证知故。出如是声。

唱呜字时。当得渡于大烦恼海。出如是声。

唱迦字时。当受诸有业报所作。出如是声。

唱佉字时。教拔一切烦恼根本。出如是声。

唱伽字时。十二因缘甚深难越。出如是声。

唱琰字时。诸无明盖覆翳甚厚。当净除灭。出如是声。

唱俄字时。如来当得成佛道已。至余诸方。恐怖众生施与无畏。出如是声。

唱遮字时。应当证知四真圣谛。出如是声。

唱车字时。今者应当所有谄曲、邪惑意迷。皆悉除灭。出如是声。

唱阁字时。应当超越出生死海。出如是声。

唱社字时。魔烦恼幢当碎破倒。出如是声。

唱若字时。当令四众皆顺教行。出如是声。

唱吒字时。其诸凡夫一切众生。处处畏敬。此言无常。出如是声。

唱咤（勅家反）字时。应当忆念此之咤字。若根纯熟。不闻诸法。即得证知。出如是声。

唱荼字时。应当得彼四如意足。即能飞行。出如是声。

唱荼（直家反）字时。作合欢花。如荼言语。散唱诸行及十二缘生灭之法。无常显现。出如是声。

唱拏字时。其得道人受利养时。无一微尘等诸烦恼。而不散灭。堪应他供。出如是声。

唱多字时。当向苦行。出如是声。

唱他字时。一切众生其心若斧。诸尘境界犹如竹木。当作是观。出如是声。

唱陀字时。当行布施。行诸苦行。即得和合。出如是声。

唱咤字时。当有法声。出如是声。

唱哪字时。当须用彼食饮活命。出如是声。

唱簸字时。真如实谛。出如是声。

唱颇字时。当得成道。证于妙果。出如是声。

唱婆字时。解一切缚。出如是声。

唱嚩字时。说世间后更不受有。出如是声。

唱摩字时。说诸生死一切恐怖最为可畏。出如是声。

唱耶字时。开穿一切诸法之门。为人演说。出如是声。

唱啰字时。当有三宝。出如是声。

唱遝字时。断诸爱枝。出如是声。

唱婆字时。断一切身根本种子。出如是声。

唱奢字时。得奢摩他、毗婆舍那。出如是声。

唱沙字时。当知六界。出如是声。

唱娑字时。当得诸智。出如是声。

唱喃字时。当打一切诸烦恼却。出如是声。

尔时。彼诸五百童子作如是唱诸字门时。以是太子威德力故。兼复诸天护持所加。出于如是微密秘奥诸法门声。

时净饭王又复集聚群臣议言：卿诸臣等一切。谁知何处有师。最便武技、善巧军戎、兵仗智略。堪教于我悉达太子？

时诸臣等奉报王言大王当知。此处有释。名为善觉。其善觉子麤提提婆（此言忍天）。堪教太子兵戎法式。其所解知。一切凡有二十九种。善巧善妙。技术精微。所作轻便。劲捷剿勇。二十九者。所谓腾象跨车。跳坑越马。射妙走疾。志猛性刚。身体轻便。所为谛审。善能调习。捉象搭钩。巧

解安施。擲象冒索。又工将养。饮饲畜生。处分指挥。善总兵马。谙练曲直。斜正山川。手握拳牢。脚踏地稳。梳头结髻。靳固甚牢。能破能开。能劈能斩。射不虚落。挽硬无双。遥闻响声。射即悬著。所放之处。箭入甚深。黠慧聪明。辞清辩捷。谋谟策算。巧解多知。讨古论今。方便善诈。诸如是等所有兵家秘要神能。悉皆通达。唯应是彼乃可堪教大王太子一切戎技。

时净饭王闻是语已。心大欢喜。即敕诸臣。令唤忍天。

其忍天至。王敕之言：麤提提婆！汝能教我悉达太子戎仗智不？

是时忍天即白王言：臣甚能教！

王复敕言：汝若知时。好教我子。令得成就。

时净饭王为于太子欲游戏故。造一园苑。名曰勤劬。

是时太子入彼苑内。游戏欢娱。或令按摩。

时彼五百诸释种臣。悉为其儿各造园苑。拟以戏笑。按摩遨游。

时忍提婆将引太子入勤劬园。教戎仗智。彼诸释种各各自入其园苑中。游戏学习。

时忍提婆将其数种兵戎器仗欲教太子。太子见已。悉皆弃舍。即语忍天作如是言：汝教其余诸释种子。我自解此。不须更学。

时忍提婆即以教于其余释种此戎仗智。而彼学已。不久人人悉得成就二十九种。并皆通达。所谓腾跳白象车马。乃至挽强。于一切处。皆成就得最第一智。轻便最能。聪明智慧。

又如是等诸王技中。最善最胜。所谓书算。解诸计数。雕刻印文。宫商律吕。舞歌戏笑。駙馘漫谈。或造诸珍。瑰

琦异宝。染衣出色。图画草叶。种种诸事。和合薰香。或弄手笔。草正诸书。能制文章。又复能于白象背上。能回能转。旋鞍羴马。所有象驼。头项尾脚。种种诸技。并悉便能。又于车边。亦善巧弄。出诸异法。刀槊弓箭。身中得悉。意气容与。相扑批腕。掬力称斤。按摩筑搦。拗胫搦臂。能掷能走。乃至不空。及闻声射。入硬挽强。箭连如雨。

太子于此一切诸技。皆悉弃舍。更不肯学。云我自解。何假须教。

复欲教习诸王要法。所谓天文。祭祀占察。悬射前事。谬语巧诵。知诸兽音。达于声论。造作诸技。因技报答。咒术杂事。十种名。治化古先一切书典。教于太子及自他释。亦如是教。又复世人积年累月所学问者。或成不成。彼等众技、一切诸论。太子能于四年之中。及余释种。皆悉学得。通达无碍。一切自在。

是时忍天即为太子而说偈言：

汝于年幼时	安详而学问
不用多功力	须臾而自解
于少日月学	胜他多年岁
所得诸技艺	成就悉过人

佛本行集经卷第十一

佛本行集经卷第十二

隋天竺三藏闍那崛多译

游戏观瞻品第十二

尔时太子生长王宫。孩童之时。游戏未学。年满八岁。出閤诣师。入于学堂。从毗奢蜜及忍天所。二大尊边。受读诸书并一切论。兵戎杂术。经历四年。至十二时。种种技能遍皆涉猎。既通达已。随顺世间。悦目适心。纵情放荡。驰逐声色。

曾于一时。在勤劬园遨游射戏。自余五百诸释种童。亦各在其自己园内。优游嬉戏。时有群雁行飞虚空。是时童子提婆达多。弯弓而射。即著一雁。其雁被射。带箭遂堕悉达园中。

时太子见彼雁带箭。被伤堕地。见已。两手安徐捧取。取已踟蹰。安雁膝上。以妙滑泽柔润水波、万字轮文福德之手。细软犹如芭蕉嫩叶。左手擎持。右手拔箭。即以酥密封于其创。

是时。提婆达多童子遣使人来语太子言：我射一雁。堕汝园中。宜速付来。不得留彼。

是时。太子报使人言：雁若命终。即当还汝。若不死者。终不可得。

时提婆达多复更重遣使人语言：若死若活。决须相还。我手于先善巧射得。遇堕落彼。云何忽留？

太子报言：我已于先摄受此雁。所以然者。自我发于菩提心来。我皆摄受一切众生。况复此雁而不属我？

以是因缘即便相竞。集聚诸释宿老智人。判决此事。

是时。有一净居诸天。变身化作老宿长者。入释会所而作是言：谁养育者。即是摄受。射著之者即是放舍。

时彼诸释宿老诸人一时印可。高声唱云：如是如是！如仁者言。

此是提婆达多童子共于太子。最初构结怨仇因缘。

复有一时。其净饭王共多释种诸童子辈。并将太子出外野游。观看田种。时彼地内所有作人。赤体辛勤而事耕垦。以牛縻系彼犁耜端。牛若行迟。时时摇掣。日长天热。喘噓汗流。人牛并皆困乏饥渴。又复身体羸瘦连骸。而彼犁场土墉之下。皆有虫出。人犁过后。时诸鸟雀竞飞下来。食此虫豸。

太子睹兹犁牛疲顿。兼被鞭撻。犁耜研领。鞅绳勒咽。血出下流。伤破皮肉。复见犁人被日炙背。裸露赤体。尘土坌身。鸟鸟飞来。争拾虫食。

太子见已。起大忧愁。譬如有人。见家亲族被系缚时。生大忧愁。太子怜悯彼诸众等。亦复如是见是事已。起大慈悲。即从马王键陟上下。下已。安详经行、思念诸众生等有如是事。即复唱言：呜呼呜呼！世间众生极受诸苦。所谓生老及以病死。兼复受于种种苦恼。辗转其中不能得离。云何不求舍是诸苦？云何不求厌苦寂智？云何不念免脱生老病死苦因？我今于何得空闲处？思惟如是诸苦恼事。

时净饭王观田作已。共诸童子还入一园。是时太子安详瞩目。处处经行。欲求寂静。忽见一处。有阎浮树。条干滑泽。端正可怜。郁蓊扶疏。人所乐见。见已。即语诸左右言：汝等诸人！各远离我。我欲私行。

是时太子发遣左右。悉令散已。渐至树下。到树下已。即于草上跏趺而坐。谛心思惟：众生有于生老病死种种诸苦。发起慈悲。即得心定。彼时即便离于诸欲。弃舍一切诸不善法。思惟境界。分别境界。欲界漏尽。即得初禅。我身亦自有如是法。未免此法。未度此轮。

当思惟时。有五神仙。飞腾虚空。自在而行。有大威德。有大势力。具足巧通毗陀之论。善解诸术。从南向北。经彼

园林阎浮树上。而欲飞过。即不能去。各相谓言：我等往昔去来自恣。穿过须弥。出诸神通。种种示现。乃至到于毗沙门宫大天王所。或至阿罗迦槃多城。亦能穿过。彼城多有种种夜叉、诸恶神等。我亦曾经彼上飞过。而此树端。我亦曾经无量过度。不曾有碍。不失神通。今日以谁威德力故。令于我等退失神通、不能得过？

彼等仙人即观其树。遂见太子在树阴下。跏趺而坐。威光巍巍。显赫难观。彼等见已。作是思惟：此坐是谁？将非是彼大梵天王、世间之主？或复是彼吃沙那天欲界之主。或天帝释。或毗沙门大库藏主。或月天子。或日天子。或复是于转轮圣王。或此坐者。得非是佛出现世乎？然今此人威德甚大。

尔时彼林守护之神告诸仙言：诸仙人辈！此非大梵世间天主。非吃沙那天欲界之主。亦非天帝及毗沙门库藏之主。亦复非是日月天子。此之太子名悉达多。是净饭王释种童子。诸仙当知。大梵天王所有威德。其吃沙那天主、帝释、毗沙门王库藏之主、月天、日天、转轮圣王诸威德等。比悉达多太子所有一毫威德。彼诸威德十六分中不及其一。是故汝等至此树林。欲上飞过。神通有限。不能得度。

时彼诸仙闻护林神如是语已。从虚空下。住太子前。各各说偈赞叹太子。时一仙人而说偈言：

世间烦恼火炽燃 此能出生法池水
既得如是微妙法 灭彼烦恼火烬无
复有一仙而说偈言：

世间愚痴甚黑暗 此能出生智慧光
既得如是微妙法 照彼昏盲一切世
复有一仙而说偈言：

忧恼旷野大泽中 此大驮乘能胜致
既得如是微妙法 能度三有诸众生
复有一仙而说偈言：

一切世间烦恼缠 此能方便令解脱
既得如是微妙法 能脱一切诸结缚
复有一仙而说偈言：

世间所有生死痼 此大医师能救疗
既得如是微妙法 能治一切生死疣

时诸仙人各各说偈叹太子已。接足顶礼。右绕三匝。飞腾虚空。相随而去。

时净饭王须臾之间不见太子。心内即生不喜不乐。而问人言：我之太子今在何处（此上两句梵本重称）。忽然不见？

是时。诸臣东西南北交横驰走。寻觅太子。莫知所在。

时一大臣遥见太子。在彼阎浮树阴之下。思惟坐禅。复见一切树影悉移。唯阎浮阴独覆太子。时彼大臣见于太子有是希奇难思议事。即大欢喜。踊跃充遍。不能自胜。急疾奔驰。走诣王所。至已长跪。依所见事。即说偈言：

大王太子今在于 阎浮树阴下端坐
跏趺思惟入三昧 光明照耀如日出
此实真是大丈夫 树影卓然不移动
唯愿大王自观察 太子相貌坐云何
譬犹大梵诸天王 亦如忉利天帝释
威神巍巍光显赫 遍照于彼诸树林

时净饭王闻已。即诣阎浮树所。遥见太子在彼树间结跏趺坐。譬如黑夜视山顶头大聚火光。出猛明焰。威德显著。炳照巍巍。如重云间忽出明月。亦如暗室燃大净灯。

时王见已。生大希有奇特之心。遍体战惶。身毛悉竖。
即头顶礼于太子足。欢喜踊跃。而作是言：善哉善哉！我此
太子大有威德。说偈赞曰：

如夜大火聚山顶 似秋明月敞云间

今见太子坐思惟 不觉毛张身战栗

时净饭王说偈赞已。更复顶礼于太子足。重说偈言：

我今再度屈此身 顶礼千辐胜妙足

从生以来至今日 忽复得见坐思惟

时有擎挾筌蹄小儿。随从大王。啾唧戏笑。有一大臣咄
彼小儿。作如是言：汝小儿辈！幸勿唱吼！

时诸小儿报彼臣言：何故不听我等喧适？

尔时大臣即以偈颂答彼一切诸小儿言：

日光虽极热猛盛 不能回彼树阴凉

复有最妙一寻光 威德世间无有匹

思惟端坐于树下 不动不摇如须弥

悉达太子内深心 乐此树阴当不舍

掬术争婚品第十三之一

尔时太子渐向长成。至年十九。

时净饭王为于太子造三时殿。一者暖殿。以拟隆冬。第
二凉殿。拟于夏暑。其第三殿。用拟春秋。二时寢息。拟冬
坐者。殿一向暖。拟夏坐者。殿一向凉。拟于春秋。二时坐
者。其殿调适。温和处平。不寒不热。

复于宫内、后园之中。堰水流渠。造作池沼、栽蒔种种
众杂名花。所谓优钵罗花、波头摩花、拘勿头花、分陀利花。
为于太子作喜乐故。复有无量无边诸人。各自职司。侍卫太
子。或复有人按摩太子。或复有人柔软太子。或复有人。以

诸香油涂搽太子。或复有人。洗浴之时揩拭太子。或复有人。澡浴之时供香汤者。或有染发、梳头髻者。或复有人。执镜照者。或执涂香。或执眼药。或复有执薰衣香者。或执牛黄。或执花鬘。或复有执种种杂色微妙衣服。立太子前。常拟供奉。太子著者。其衣悉是迦尸迦衣。执已曲躬。须者即进。

其太子父输头檀王。所著衣里。若迦尸迦。外表则用其余诸物。太子不然。所服之衣。内外悉用迦尸迦作。太子左右及执作人、僮仆男女、诸后从等。皆悉喂以粳粮之饭。杂肉菹酱。或臠或羹。太子一身。别置妙好香美粳粮。精细拣择。羹臠杂飮。百味兰肴。种种珍馐。及诸饼果。如是无量。日别恒常。昼夜修营。各皆新造。以拟太子。又持白盖覆太子上。或畏夜戏。零露风霜。或复昼游。尘埃日照。

时净饭王既见太子年渐向大。心中复忆阿私陀仙授记之语。集诸耆旧释种大臣而作是言：汝等亲族曾闻知不？我此太子初生之时。召诸解相及婆罗门。阿私陀等皆记之言：其若在家。定当得作转轮圣王。若舍出家。必得成就于无上道。而我等今作何方便。令此童子得不出家。

诸释亲族即报王言：大王今当速为太子别造宫室。令诸嫔女娱乐嬉戏。是则太子不舍出家。而有偈说：

阿私陀所记 决定无移动

诸释劝立殿 望使不出家

如是方便。我等释种可得兴盛。能令一切恭敬尊重。不为粟散诸王所欺。

时净饭王复语释种诸亲族言：汝等当观谁释女堪与我太子悉达为妃。

尔时五百诸释种族各各唱言：我女堪为太子作妃（上两句梵本悉再称今略）。

时净饭王复自思惟：若我今日不共太子如是筹量。忽取他女与其作妃。脱不称可。则成违负。若我今共太子语论。太子意深终不肯道。我今狐疑。作何方便？复更思惟：我今可以种种杂宝。作无忧器。持与太子。令太子用。施诸女人。密遣使覘。观察其意。看于太子。眼目瞻瞩在于谁边。我即娉取。与其作妃。

时净饭王即遣造作杂宝玩弄无忧之器。所谓金银种种杂饰。造已。即于迦毗罗城振铎唱言：从今以去。至七日来。我太子欲见于释种一切诸女。见已。欲施一切杂宝、种种玩弄、无忧之器。城内所有一切诸女悉可来集于我宫门。

尔时太子六日已过。至第七日。于先出在王宫门前。据筌蹄坐。是时城内一切诸女。皆以种种杂宝璎珞各严其身。来集宫门。欲见太子。复欲受取种种诸宝、无忧之器。

是时。太子见诸女来。即持种种宝器施与。彼等诸女从四方来见太子者。以是太子威德大故。诸女不能正看太子。但取宝器。各各低头速疾而过。

宝器尽已。最后有一婆私吒族释种大臣摩诃那摩。其女名为耶输陀罗。前后侍从。众多婢媵围绕而来。遥见太子。眦眦注睛。举目雅步。瞻观直眄。目不斜窥。渐进前趋。来近太子。如旧相识。曾无愧颜。即白太子。作如是言：太子！今可与我杂宝无忧器来。

太子报言：汝来既迟。皆悉施尽。

彼女复更白太子言：我有何过？汝今欺我。不与宝器。

太子答言：我不欺汝。但汝后来。自不及耳。

是时太子指边有一所著印环。价值百千。从指脱与耶输陀罗。

耶输陀罗白太子言：我于汝边。可止值于尔许物耶？

太子报言：我之所著。自余璎珞。任意所取。

彼女白言：我今岂可剥脱太子。只可庄严于太子身。

语于太子作是言已。心不喜欢。即回还去。

尔时世尊成道以后尊者优陀夷而白佛言：世尊！云何如来在王宫时。将身一切无价璎珞脱持施与耶输陀罗。不能令彼心生欢喜？

佛告尊者优陀夷言：汝优陀夷！至心谛听。我当说之。耶输陀罗非但今世与其璎珞令不欢喜。其往昔来。曾因少缘生嗔恨故。虽复多种珍宝布施。犹不欢喜。

优陀夷言：甚奇世尊！此事云何？愿为我说。

尔时佛告优陀夷言：我念往昔无量世时。迦尸国内波罗奈城。时有一王。信邪倒见而行治化。彼王有子。造少罪愆。父王驱摈。令出国界。渐渐行至一天寺中。共妇相随。居停而住。时彼王子所将食粮皆悉罄尽。王子游猎。杀捕诸虫。以用活命。所猎之处。见一鼯虫。趁而杀之。即剥其皮。内水中煮。其欲向熟。汁便竭尽。是时王子语其妇言：肉未好熟。卿更取水。彼王子妇。即便取水。妇去已后。王子饥急。不能忍耐。即食鼯肉。一切悉尽。不留片残。

时王子妇取水回还。问其夫言：此中鼯肉。今在何处？

王子报言：鼯忽然活。今已走去。

其妇不信。何忽如是？鼯煮已熟。云何能走？妇心不信。而意思念。必是我夫饥急食尽。诳我言走。情怀嗔恨。心常不欢。

于后数年。其父命终。时诸大臣即迎王子。灌顶为王。既作王讫。所得众宝及诸奇珍、种种衣裳、无价之物皆悉与妃。其妃虽纳。而面颜色。不悦如前。

尔时彼王语其妃言：我一切宝、无价之物以持赐妃。何故颜色而不欢悦。如前不异？

时其夫人即说偈颂以报王言：

最胜大王听 往昔游猎时
执箭或持刀 射杀野鬣死
剥皮煮欲熟 遣我取水添
食肉不留残 而诳我言走

告优陀夷：此汝当知。尔时王者。我身是也。其王后者。今日耶输陀罗是也。我于尔时少许犯触。续于后时。多以财宝。与望和适。而其怀恨。犹不喜欢。今日亦然。虽将无量诸种钱帛。亦不能令其心欢喜。

时净饭王所遣密使察太子者。一心睹于太子眼目。其所瞻瞩。共于诸女相当语对。而彼密使委悉皆知。知己即时往诣王所而白王言：大王当知。有释大臣摩诃那摩。其女后来。太子共语。数番往复。兼且微笑。停住少时。调戏言语。太子彼女。二颜俱悦。彼此答对。四目相当。

时净饭王闻彼密观如是语已。心内思惟：太子意欲得彼女耶？

时净饭王看好吉宿、良善之日。即唤国师婆罗门来。使向释种摩诃那摩大臣之家。而作是言：知卿有女。今可与我太子作妃。

是时国师闻王语已。即诣释种摩诃那摩大臣之家。作如是言：摩诃那摩！王敕如是。

时释大臣报国师言：我释迦法。相承如是。若有技能胜一切者。于彼人边即嫁女与。若无技能。不得与女。大王太子。生长深宫。耽湎嬉戏。未曾学习。无有技能。弓射天文、

兵书戎仗、一切战斗、掬力拳捶。悉未工闲。我何故今无艺人边而嫁女与？

是时国师闻是语已。还至王所。将如是语具白于王。时净饭王闻此语已。心怀愁恼。如是思惟：摩诃那摩此语如法。向我实论。无一虚妄。虽作是念。而王内心怅怏默然。迷闷而住。其状如似坐禅思惟。

太子是时见父王面。失于容色。怅怏不欢。犹如坐禅思惟一种。见是事已。渐至王所而问王言：未审父王以何缘故。如是愁恼。独坐思惟？

作是语已。时净饭王答太子言：子不须问我如此事。

太子再问。父王重止。太子如是三问父王：大王要须报我所以。解我心疑。

时净饭王三见太子问如是事。即向太子如前所说。太子知己。问父王言：父王颇知父王城内有人能出与我共试技艺以不？

时净饭王闻此语已。即大欢喜。踊跃遍身。不能自胜。即更重审问于太子。作如是言：善哉太子！汝实能掬诸技艺不？

太子答言：大王善听。我今实能。大王但当速集诸释一切童子。共我掬试诸有技艺。

时净饭王敕迦毗罗。城内街巷、四衢道头悉教振铎。大声唱令。从今以去。计至七日。我之储宫悉达太子。今欲出其所有诸技。若有解者。悉令聚集。共掬试看。

时六日过。至第七日。五百释种诸童子等。悉达为首。并皆聚集。聚集讫已。相共出城。至一宽地。是诸童子出技能处。

时释大臣即好庄严耶输陀罗。为上胜塚。作如是言：谁能善通一切技艺、最胜上者。即以此女与其作妻。

时净饭王共诸释种耆旧长德。于先而至。复有无量无边杂姓男子女人、童男童女。皆悉聚集。诣彼试场宽地之所。欲观太子及诸释种一切童子。掬试技能。谁最为胜。

是时。有诸释种童子文学快者。先共太子试于手笔。时有释种相共谓言：今者宜令毗奢蜜多为作试师。即语之言：汝可观察。诸童子内。手笔谁胜。或复快书、疾书善书、解多种书。

尔时。毗奢蜜多大师先知太子于诸书中最胜最上。熙怡微笑而说偈言：

一切人间及天上	乾闥修罗迦楼罗
所有文字诸书典	太子遍历皆通达
我身及以汝等辈	不知如此书籍名
人间悉解我试来	定知其胜汝不如

尔时。彼等释种徒众详共齐白净饭王言：我今已知大王太子于书典中最为胜上。算计须试。得知谁明。

是时。众中有一最大算计之师。名颍谁那。一切算计最为第一。时释众唤颍谁那来。将往试验。语言：尊者！汝好观看诸童子中。是谁算计为最第一。

时太子算。令一释种明了童子对下算筹。而不能供。更二童子下犹不供。三童子下亦不能供。乃至一十童子俱下而亦不供。二十三十、四五十、一百共下而亦不供。二百三百、四百五百一时尽下。犹尚不供。

是时。太子作如是言：汝等今算。我当为下。

时一释种童子唱算。太子为下。不能算得。太子复言：二人双计。复不能及。太子复言：乃至一百一时共计。犹不

能及。太子复言：汝等何假如是相竞。但此等辈一切一时各自计唱。我当为下。时诸释种五百童子一时俱唱。太子为其一时齐下。如上所数。从于一起乃至尽数。太子不错。亦复不乱。安详审谛。次第而下。彼等一切诸释童子。尽力共算不能及逮悉达太子万分之一。

时频谁那国大算师心密惊怪。极生欢喜而说偈言：

善哉捷利深忆持	分明唱下无有错
五百释童称解算	一时共对不能当
如是智慧正念心	算计疾速甚深奥
是等算师计天下	巨海滴数悉应知
汝等默然且禁声	不须与彼相掬竞
其既解知如是术	应得共我相较量

时彼释众一切皆生希有之心。从坐而起。合十指掌。顶礼太子谓悉达多。太子大胜。真实大胜。同声复白净饭王言：善哉大王！大得善利。善生人间。大王今生如是聪睿大福德子。智慧之子。舌根如是。轻便啍滑。成就口业。

时净饭王熙怡微笑。语太子言：善哉太子！汝今能共此频谁那大算之师计算世间方便智能、得相入不？

是时太子答父王言：大王我能！

时净饭王语太子言：汝若能者。当自知时。

时频谁那大计算师语太子言：仁者太子！汝知亿上算数以不？

太子答言：我甚知之！

时频谁那算师复言：汝知云何？为我说之。

太子答言：凡入亿中算计数者。汝等谛听。我今说之：

一百百千。是名拘致（此数千万）。其百拘致。名阿由多（此数十亿）。百阿由多。名那由他（此数千亿）。百那由

他。名波罗由他（此数十万亿）。百波罗由他。名殑伽罗（此数千万亿）。百殑伽罗。名频婆罗（此数十兆）。百频婆罗。名阿刍婆（此数千兆）。百阿刍婆。名毗婆娑（此数十万兆）。百毗婆娑。名郁曾伽（此数千万兆）。百郁曾伽。名婆诃那（此数十京）。百婆诃那。名那伽婆罗（此数千京）。百那伽婆罗。名帝致婆罗（此数十万京）。百帝致婆罗。名卑婆娑他那波若帝（此数千万京）。百卑婆娑他那波若帝。名醯兜奚罗（此数十垓）。百醯兜奚罗。名迦罗逋多（此数千垓）。百迦罗逋多。名醯都因陀罗陀（此数十万垓）。百醯都因陀罗陀。名三曼多罗婆（此数千万垓）。百三曼多罗婆。名伽那那伽尼多（此数十秭）。百伽那那伽尼多。名尼摩罗阇（此数千秭）。百尼摩罗阇。名目陀婆罗（此数十万秭）。百目陀婆罗。名阿伽目陀（此数千万秭）。百阿伽目陀。名萨婆婆罗（此数十壤）。百萨婆婆罗。名毗萨阇波帝（此数千壤）。百毗萨阇波帝。名萨婆萨若（此数十万壤）。百萨婆萨若。名毗浮登伽摩（此数千万壤）。百毗浮登伽摩。名婆罗极叉（此数十沟）。

入于如是算计之数。其须弥山若欲算知。斤两铢分悉可得知。自此以上。复有一算。名陀婆阇伽尼民那。此之以上。复有算计。名奢槃尼。此尼以上。复有算名波罗那陀。此上复有算名伊吒。此上复有算名迦楼沙吒啤多。此上复有算名萨婆尼差波。至于此计恒河沙等一切算数。总览尽收。此上复有算计数名阿伽娑婆。此数数于一恒河沙、亿百千万恒河沙数。计取悉皆总入于此。而于此上。复更有计。名波罗摩窣毗婆奢。

时频伽那大计算师语太子言：如是已知。其入微尘数算之计。更复云何？今亦须知。

太子答言：汝等谛听。我今说之。凡七微尘成一窗尘。合七窗尘成一兔尘。合七兔尘成一羊尘。合七羊尘成一牛尘。合七牛尘成于一虬。合于七虬成于一虱。合于七虱成一芥子。合七芥子成一大麦。合七大麦成一指节。累七指节成于半尺。合两半尺成于一尺。二尺一肘。四肘一弓。五弓一杖。其二十杖。名为一息。其八十息。名拘卢奢。八拘卢奢名一由旬。于此众中。有谁能知几许微尘成一由旬（依此数计得二百八十四里一百三十步）？

时颍谁那大算计师报太子言：大德仁者！我尚不知如是之数。我今闻说犹生迷闷。况复自余少智少闻愚痴之人！虽然。唯愿太子为我等说。几许微尘成一由旬？

佛本行集经卷第十二